



نشرة



BULETIN KUPU SB
JANUARI – JUN 2022M



مجلس كونيون كليات كيبلس

كوليج يونيورسيتي فرگوروان اكام سري بگاوان
نكارا بروني دارالسلام

Sidang Redaksi

RA'ES

Dr Haji Adanan bin Haji Basar

PEMANGKU TIMBALAN RA'ES

Dr Haji Abang Hadzmin bin Haji Abang Taha

PEMANGKU PENOLONG RA'ES / PENASIHAT

Datin Dr Hajah Noor Hira binti Haji Noor Kaseh

PEMANGKU PENDAFTAR

Adi Rani Soffian bin Abdul Rahman

EDITOR PENYELARAS

Nurul Atteyia Bahtriyah binti Md Salleh
Pengarah Pejabat Antarabangsa
dan Perhubungan Awam

PEMASARAN

Pengiran Timbang bin Pengiran Haji Serudin
Shamran bin Haji Mohd Said
Hajah Mina binti Haji Mail
Tirahmad binti Abdullah Sani

EDITOR

Erna binti Omar

PENYEMAK

Hajah Razidah binti Haji Jamaluddin
Hajah Rakiah binti Tuah

SUMBER BERITA DAN FOTOGRAFI

Fakulti / Pusat / Bahagian KUPU SB
Pelita Brunei
Media Permata
Borneo Buletin

ATUR HURUF DAN REKABENTUK

Azari bin Haji Mat Zahari

DICETAK OLEH

Brunei Press Sdn. Bhd

PENYELERAS PENERBITAN MAJALAH

Nor Ara binti Abd Rahman
Muhammad Hadi Asrul bin Haji Othman
Pengiran Haji Shahrman bin Pengiran Haji Basar

© Hak Cipta Kolej Universiti Perguruan Ugama Seri Begawan (KUPU SB), Brunei Darussalam. Semua Hak Terpelihara. Tulisan-tulisan yang dimuatkan tidak semestinya menggambarkan pendapat dan pandangan KUPU SB. Artikel-artikel ini tidak boleh dipetik atau disiarkan semula tanpa kebenaran bertulis daripada Yang Mulia Ra'es KUPU SB dan penulis berkenaan. ©Kolej Universiti Perguruan Ugama Seri Begawan (KUPU SB), 2022M.

Nota : Sidang Redaksi memohon maaf jika terdapat sebarang berita, maklumat, gambar dan sebagainya yang tidak disiarkan dalam keluaran ini. Harap maklum dan terima kasih.

Tinta Sidang Editor

بِسْمِ اللَّهِ الرَّحْمَنِ الرَّحِيمِ

السلام عليكم ورحمة الله وبركاته

Alhamdulillah, syukur ke hadrat Allah Subhanahu Wata'ala, Nashrah keluaran Januari-Jun 2022M dapat diterbitkan dengan izinNya jua serta dengan kerjasama semua pihak yang terlibat. Jutaan terima kasih diucapkan pada para penyumbang dalam penerbitan ini sama ada dari segi penulisan, fikrah dan tenaga.

Antara berita utama keluaran kali ini ialah Majlis Konvokesyen Ke-11 yang telah diadakan pada bulan Februari 2022M bagi meraikan kejayaan para graduan yang telah menamatkan kursus pengajian mereka. Seperti yang dinyatakan Ra'es Kolej Universiti Perguruan Ugama Seri Begawan dalam perutusan beliau dalam buku program Konvokesyen Ke-11 ialah program yang disediakan KUPU SB adalah bertujuan untuk melahirkan graduan sebagai modal insan yang berwibawa secara holistik dengan pengalaman pendidikan Islam, penguasaan pedagogi secara profesional dan penghayatan dalam penghayatan keimanan, amal soleh dan adab-adab Melayu Islam Beraja.

Ilmu Pengetahuan merupakan antara komponen penting dalam pembangunan negara. Secara amnya, ilmu boleh diperolehi dengan mudah hanya dengan membaca.

أَقْرَأُ بِأَسْمِ رَبِّكَ الَّذِي خَلَقَ ① خَلَقَ الْإِنْسَانَ مِنْ عَلَقٍ ② أَقْرَأُ وَرَبُّكَ الْأَكْرَمُ ③ الَّذِي عَلَّمَ بِالْقَلَمِ ④ عَلَّمَ الْإِنْسَانَ مَا لَمْ يَعْلَمْ ⑤

Tafsirnya :

Bacalah (wahai Nabi Muhammad) dengan (menyebut) nama Tuhanmu yang menciptakan (sekalian makhluk). Dia telah menciptakan manusia daripada segumpal darah beku. Bacalah, dan Tuhanmu Maha Pemurah. Yang mengajar (manusia menulis) dengan qalam (pena). Dia mengajar manusia apa yang tidak diketahuinya.

Surah al-'Alaq: 1-5

Akhir kalam, semoga beroleh manfaat dalam keluaran kali ini dengan harapan, keluaran seterusnya akan sentiasa memberikan ilmu baharu bagi para pembaca.

Salam Hormat

Erna Omar



Kandungan

**Titah Kebawah Duli Yang Maha Mulia
Paduka Seri Baginda Sultan Haji Hassanal Bolkiah
Mu'izzaddin Waddaulah ibni Al-Marhum Sultan Haji
Omar 'Ali Saifuddien Sa'adul Khairi Waddien,
Sultan dan Yang Di-Pertuan Negara Brunei
Darussalam Sempena Majlis Konvokesyen Kali Ke-11
Kolej Universiti Perguruan Ugama Seri Begawan
(KUPU SB)**

Sekitar Majlis Konvokesyen Kali Ke-11 KUPU SB	7	Kaedah Pengajaran Melayu Islam Beraja Dalam Mencapai Wawasan 2035 : Program Pendidikan Melayu Islam Beraja	20
Majlis Penandatanganan Memorandum Persefahaman MoU dan Majlis Kesyukuran Tamat Pengajian Bersempena Majlis Konvokesyen Kali Ke-11 KUPU SB	9	MuBaArak Brunei 1443H	21
Program Nadwah Tarbiah Islamiah : Sosiologi Pendidikan 'Kepimpinan Pendidikan Alaf Baru'	11	Program Nadwah Tarbiah Islamiah: Kepelbagaian Pentaksiran Di Dalam Meningkatkan Keberkesanan Pengajaran dan Pembelajaran	22
Ceramah Jerayawara Vaksin Ketuhanan dan Tawakal	12	Program Pendidikan Melayu Islam Beraja Bagi Institusi Pengajian Tinggi : Satu Penelitian	23
Program Nadwah Tarbiah Islamiah : Inovasi Pendidikan Islam 'Model K.H.A.I.R'	12	Majlis Ceramah Program Ihya Syabab Al-Wathan	24
Upacara Menaikkan Bendera Sempena Sambutan Ulang Tahun Hari Kebangsaan Negara Brunei Darussalam Kali Ke-38, Tahun 2022M	13	Majlis Penyampaian Barakah Ramadan Bagi Tahun 1443H / 2022M	25
Pengajaran dan Penghayatan Peristiwa Isra' dan Mi'raj : Penerapan Aqidah Ahli Sunnah Waljama'ah Dalam Institusi Keluarga	15	Majlis Mahabbah Ramadan 1443H / 2022M	26
Halaqah Syariah Bimbingan Solat Sempena Sambutan Isra' dan Mi'raj 1443H	16	Program Pameran Pembelajaran Kesenian Khat Jawi dan Program Tarhib Ramadan	27
Nadwah Tarbiah Islamiah Khas : Menjayakan Wawasan Negara Melalui Pendidikan	17	Majlis Penutup Tadarus Ihya Ramadan Bagi Tahun 1443H / 2022M	28
Dakwah Melalui Tadabbur Al-Quran, Al-Hadith dan Pengajian Kitab Turath di Masjid-Masjid Negara Brunei Darussalam	18	Perjumpaan Di Antara Kementerian Kebudayaan, Belia dan Sukan dan Kolej Universiti Perguruan Ugama Seri Begawan (KUPU SB)	29
Majlis Penyampaian Hadiah Bagi Pertandingan Musabaqah Menghafaz Al-Quran Sempena Sambutan Ulang Tahun Hari Kebangsaan Negara Brunei Darussalam Kali Ke-38 dan Sambutan Isra' dan Mi'raj	19	Majlis Menandatangani Memorandum Perjanjian (MoA) Antara Pusat Pengkajian Kefahaman Ahli Sunnah Waljama'ah, Kolej Universiti Perguruan Ugama Seri Begawan (KUPU SB) dan Fakulti Usuluddin, Universiti Islam Sultan Sharif Ali (UNISSA)	30
		Multaqa Usuluddin : Kurikulum Usuluddin 'Pemantapan dan Keberkesanan'.	31
		Seminar Pendidikan Vaksin Ketuhanan dan S.O.P Ugama	35
		Bicara Kepemimpinan Da'ie : Memperkasa Kualiti Du'at Ke Arah Yang Progresif dan Berkesan	39
		Perasmian Mu'tamar Antarabangsa Fiqh Al-Usrah 2022M (MUAFIQ 22)	40

TITAH

Kebawah Duli Yang Maha Mulia Paduka Seri Baginda Sultan
Haji Hassanah Bolkiyah Mu'izzaddin Waddaulah ibni Al-Marhum Sultan Haji Omar 'Ali Saifuddin
Sa'adul Khairi Waddien, Sultan dan Yang Di-Pertuan Negara Brunei Darussalam
Sempena Majlis Konvokesyen Kali Ke-11
Kolej Universiti Perguruan Ugama Seri Begawan 1443H Hijrah / 2022M Masihi
Khamis, 16 Rejab 1443 Hijrah bersamaan 17 Februari 2022 Masihi
bertempat di Pusat Persidangan Antarabangsa, Berakas
Negara Brunei Darussalam

Assalamu'alaikum Warahmatullahi Wabarakatuh

Bismillaahir Rahmaanir Raheem

Alhamdulillah Rabbil 'Alameen, Wabihee Nasta'eenu 'Alaa Umuuriddunya Wadden,
Wassalaatu' Wassalaamu 'Ala Asyaraful Mursaleen, Sayyidina Muhammaddin, Wa'ala Aalihee
Wasahbihee Ajma'een, Waba'du.

Beta bersyukur ke hadhrat Allah Subhanahu Wata'ala kerana dengan izin-Nya jua, dapatlah kita hadir ke **Majlis Konvokesyen Kolej Universiti Perguruan Ugama Seri Begawan Ke-11** pada pagi yang berkat ini.

Dengan hati yang tulus ikhlas, Beta merakamkan ucapan tahniah dan syabas kepada para graduan di atas kejayaan mereka menamatkan kursus dan pengajian masing-masing.

Ucapan yang sama juga Beta tujukan kepada semua tenaga akademik dan ahli keluarga di atas kesabaran dan dedikasi mereka memberikan bimbingan dan sokongan kepada para graduan sehingga mereka itu berjaya.

Dedikasi adalah antara ciri utama untuk meraih kejayaan dan keberkesanan dalam pendidikan. Oleh itu para guru, ibu bapa dan lebih-lebih lagi graduan sendiri sangatlah mustahak untuk sentiasa memiliki sifat dedikasi itu.

Bagi para graduan adalah perlu untuk mengamalkan pengalaman dan pengetahuan yang diperolehi dari pusat pengajian seperti KUPU SB ini, serta menyebarkannya kepada masyarakat. Pengalaman dan pengetahuan yang sentiasa dipupuk dan diamalkan itulah, sebenar-benarnya, matlamat pengajian.

Beta melihat, KUPU SB sangat berkaitan dengan banyak keperluan semasa.

Sejak penggubalan korikulumnya beberapa tahun yang lalu, KUPU SB sudahpun menawarkan pelbagai kursus minor sebagai nilai tambah bagi pengalaman dan pasaran kerjaya graduannya.

Demikian juga KUPU SB telah menjadikan 'Sejarah Islam' sebagai subjek teras bagi Program Sarjana Muda dan Diploma Tertinggi Perguruan Ugama. Langkah ini diambil, adalah sebagai respon spontan terhadap titah Beta semasa Majlis Mengadap Hari Keputeraan pada tahun 2018, yang menyarankan supaya Mata Pelajaran Sejarah Islam itu dijadikan mata pelajaran wajib di semua institusi pengajian. Tahniah kepada KUPU SB.

Sehubungan itu, Beta telahpun memperkenalkan penubuhan sebuah lagi fakulti baru di KUPU SB iaitu 'Fakulti Pendidikan Sains Kemasyarakatan', yang akan berfungsi untuk membuat penyelidikan, mengembangkan silibus dan pedagogi yang berkaitan dengan kemasyarakatan, seperti Sejarah Islam, Pendidikan Kesihatan, Peradaban dan lain-lain.

Beta juga gembira mengikuti langkah-langkah kemasyarakatan KUPU SB, seperti mengadakan program-program kerohanian dan intelek dengan menganjurkan umpamanya, jerayawara Menghalusi Sembahyang Menurut Mazhab As-Syafi'e yang melibatkan sehingga lebih kurang 1,500 guru-guru yang bukan mengajar subjek Pengetahuan Ugama Islam di Kementerian Pendidikan, menganjurkan Kursus *Training for Trainers* untuk guru-guru bagi kemahiran mengajar al-Qur'an, menganjurkan Seminar Kebangsaan Pendidikan MIB, mengadakan Bengkel Pemantapan Da'ie dan lain-lain.

Ini semua adalah projek ilmu yang bermanfaat belaka.

Dari sudut antarabangsa pula, Beta mengambil maklum bahawa KUPU SB adalah semakin menyerlah di kalangan universiti-universiti mahupun individu yang berminat dalam bidang pendidikan. Beberapa seminar antarabangsa secara maya dan kesepakatan membuat kajian bersama di antara KUPU SB dengan universiti luar negara telahpun pernah diadakan. Sementara pada tahun ini, KUPU SB terus melangkah ke hadapan menawarkan biasiswa "Brunei Darussalam Government Scholarship for Foreign Students" kepada calon-calon yang berkelayakan di peringkat serantau dan antarabangsa.

Apabila ini diteroka, bererti KUPU SB telah mengembangkan sayapnya sehingga ke arena antarabangsa.

Akhirnya, Beta merakamkan ucapan terima kasih dan penghargaan kepada semua warga KUPU SB, terutama kepada Pengerusi dan Ahli-ahli Majlis Kolej Universiti dan Senat, Ra'es, pegawai-pegawai utama, ahli-ahli akademik serta kakitangan sekalian di atas jasa dan khidmat mereka yang telah disumbangkan.

Marilah kita sama-sama berdoa, semoga setiap amal kebajikan itu akan diganjar oleh Allah dengan ganjaran yang melimpah-limpah.

Sekian, Wabillahit Taufeq Walhidayah, Wassalamu 'Alaikum Warahmatullahi Wabarakatuh.

SEKITAR MAJLIS KONVOKESYEN KE-11

KOLEJ UNIVERSITI PERGURUAN UGAMA SERI BEGAWAN TAHUN 1443H/2022M

Khamis, 16 Rejab 1443H bersamaan 17 Februari 2022M, Majlis Konvokesyen Ke-11 KUPU SB berlangsung di Dewan Plenary, Pusat Persidangan Antarabangsa, Berakas.

Keberangkatan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, Canselor Kolej Universiti Perguruan Ugama Seri Begawan (KUPU SB) dijunjung oleh Menteri Hal Ehwal Ugama, Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman; Ketua Hakim Syarie, Yang Amat Arif / Yang Berhormat Pehin Orang Kaya Paduka Seri Utama Dato Paduka Seri Setia Haji Awang Salim bin Haji Besar; Ra'es KUPU SB, Yang Mulia Dr Haji Adanan bin Haji Basar; dan Pemangku Pendaftar KUPU SB, Yang Mulia Awang Adi Rani Soffian bin Abdul Rahman.

Terdahulu, majlis dimulakan dengan bacaan Surah al-Fatihah yang dipimpin oleh Mufti Kerajaan, Yang Berhormat Pehin Datu Seri Maharaja Dato Paduka Seri Setia (Dr) Ustaz Haji Awang Abdul Aziz bin Juned.

Perarakan keberangkatan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam didahului dengan pengusungan Mushaf al-Quran yang dibawa masuk oleh Yang Mulia Pengiran Haji Amirul Amin bin Pengiran Haji Jamaluddin ke dalam dewan.

Majlis diteruskan dengan Nyanyian Lagu Kebangsaan Negara Brunei Darussalam, diikuti dengan bacaan surah Ali-'Imran, ayat 132 hingga



134; dan surah al-'Alaq, ayat 1 hingga 5 beramai-ramai oleh para graduan.

Majlis kemudian disusuli dengan sembah alu-aluan oleh Yang Mulia Ra'es KUPU SB.

Pada majlis tersebut, Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam berkenan mengurniakan titah, seterusnya



Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam berkenan menganugerahkan Ijazah dan Diploma kepada para graduan.



menyempurnakan penganugerahan ijazah dan diploma kepada 224 graduan.

Daripada jumlah tersebut, seorang graduan dianugerahkan Ijazah Doktor Falsafah Perguruan Ugama dalam bidang Pendidikan; tiga graduan dianugerahkan Ijazah Doktor Falsafah Perguruan Ugama dalam bidang Pendidikan Islam; seorang graduan dianugerahkan Ijazah Doktor Falsafah Perguruan Ugama dalam bidang Syariah; seorang graduan dianugerahkan Ijazah Sarjana Perguruan Ugama (Kajian Ahli Sunnah Waljamaah); seorang graduan dianugerahkan Ijazah Sarjana Perguruan Ugama (Bahasa Arab); tiga graduan dianugerahkan Ijazah Sarjana Perguruan Ugama (Pendidikan Islam); dan dua graduan dianugerahkan Ijazah Sarjana Perguruan Ugama (Syariah).

Sementara itu, seramai lapan graduan menerima Ijazah Sarjana Muda Perguruan Ugama (Pendidikan Bahasa Arab); lima graduan menerima Ijazah Sarjana Muda Perguruan Ugama dalam Pendidikan Islam dengan minor Pengajian al-Quran dengan al-Sunnah; enam graduan menerima Ijazah Sarjana Muda Perguruan Ugama dalam Pendidikan Islam dengan minor Bimbingan dan Kaunseling; lima graduan menerima Ijazah Sarjana Muda Perguruan Ugama dalam bidang

Pendidikan Islam dengan minor Dakwah dan Kepimpinan; tiga graduan menerima Ijazah Sarjana Muda Perguruan Ugama dalam bidang Pendidikan Islam dengan minor Falsafah dan Pemikiran Islam; 15 graduan menerima Ijazah Sarjana Muda Perguruan Ugama dalam bidang Pendidikan Islam dengan minor Fiqh Usrah; tiga graduan menerima Ijazah Sarjana Muda Perguruan Ugama dalam bidang Pendidikan Islam dengan minor Kewangan Islam; enam graduan menerima Ijazah Sarjana Muda Perguruan Ugama dalam bidang Pendidikan Islam dengan minor Pendidikan Melayu Islam Beraja; tujuh graduan menerima Ijazah Sarjana Muda Perguruan Ugama dalam bidang Pendidikan Islam dengan minor Pendidikan Awal Kanak-kanak; 10 graduan menerima Ijazah Sarjana Muda Perguruan Ugama dalam bidang Pendidikan Islam dengan minor Pendidikan Khas; 10 graduan menerima Ijazah Sarjana Muda Perguruan Ugama dalam bidang Pendidikan Islam dengan minor Pendidikan Sains Kesihatan; sembilan graduan menerima Ijazah Sarjana Muda Perguruan Ugama dalam bidang Pendidikan Islam dengan minor Inovasi dan Teknologi Pendidikan Islam; dan empat graduan menerima Ijazah Sarjana Muda Perguruan Ugama dalam bidang Pendidikan Islam dengan minor Usul Fiqh.

Manakala seramai 27 graduan menerima Diploma Perguruan Ugama Lepas Ijazah; tujuh graduan menerima Diploma Perguruan Ugama Lepas Ijazah (Pengajaran Bahasa Arab bagi penutur bukan Arab); 80 graduan menerima Diploma Tertinggi Perguruan Ugama dalam Pendidikan Islam; lima graduan menerima Diploma Pengajian Seni al-Quran; seorang graduan menerima Diploma Pengajian Kitab Turath; dan seorang penerima bagi Sijil Khas Perguruan Ugama.

Bagi memberkati majlis, Doa Selamat dibacakan oleh Yang Berhormat Mufti Kerajaan.



Para graduan di Majlis Konvokesyen Ke-11 KUPU SB, yang berlangsung di Dewan Plenary, Pusat Persidangan Antarabangsa, Berakas

MAJLIS PENANDATANGANAN MEMORANDUM PERSEFAHAMAN (MoU) DAN MAJLIS KESYUKURAN TAMAT PENGAJIAN Bersempena Majlis Konvokesyen Ke-11 KUPU SB



Yang Mulia Ra'es Kolej Universiti Perguruan Ugama Seri Begawan (KUPU SB) di Majlis Penandatanganan Memorandum Persefahaman (MoU) dan bertukar-tukar MoU yang ditandatangani bersama pihak SMARTER, diwakili oleh Yang Dipertua SMARTER, Yang Mulia Pengiran Zamri bin Pengiran Haji Bujang, yang turut disaksikan oleh Yang Mulia Setiausaha Tetap, Kementerian Hal Ehwal Ugama.

Sabtu, 18 Rejab 1443H bersamaan 19 Februari 2022M, Kolej Universiti Perguruan Ugama Seri Begawan (KUPU SB) mengadakan Majlis Kesyukuran dan Penyampaian Anugerah Akademik bersempena Majlis Konvokesyen Ke-11 KUPU SB, bertempat di Dewan Plenary, Pusat Persidangan Antarabangsa, Berakas.

Hadir selaku tetamu kehormat, Setiausaha Tetap, Kementerian Hal Ehwal Ugama, Yang Mulia Awang Haji Mohammad Rosli bin Haji Ibrahim.

Majlis diadakan bagi meraikan graduan yang menamatkan pengajian di KUPU SB dengan menzahirkan kesyukuran kepada Allah Subhanahu Wata'ala atas kejayaan yang diraih.

Majlis diselajurkan dengan Majlis Khatam Al-Quran bagi para graduan, Penyampaian Anugerah Akademik dan Wakaf Tarbiah daripada para graduan juga Majlis Penandatanganan Memorandum Persefahaman (MoU).

Penandatanganan Memorandum Persefahaman (MoU) dan Pertukaran MoU ditandatangani oleh Yang Mulia Ra'es KUPU SB sementara bagi pihak SMARTER, diwakili oleh Yang Dipertua SMARTER, Yang Mulia Pengiran Zamri bin Pengiran Haji Bujang, yang turut disaksikan oleh Yang Mulia Setiausaha Tetap, Kementerian Hal Ehwal Ugama.

Terlebih dahulu, acara dimulakan dengan Nyanyian Lagu Kebangsaan Negara Brunei Darussalam, 'Allah Peliharakan Sultan' dan bacaan Zikir Asmaul Husna beramai-ramai.

Majlis Khatam Al-Quran dimulakan dengan bacaan surah al-Fatihah, diketuai oleh tetamu kehormat majlis, diikuti dengan bacaan doa sebelum membaca al-Quran dan ayat-ayat suci al-Quran bermula dari surah Adh-Dhuha hingga surah al-Masad beramai-ramai oleh para graduan. Majlis Khatam al-Quran diakhiri dengan Doa Khatam yang dibacakan secara beramai-ramai.

Acara kemudian diteruskan dengan Majlis Penandatanganan MoU, yang disaksikan oleh tetamu kehormat di antara KUPU SB bersama Kolej Pengajian Siswazah Antarabangsa (Kolej IGS); dan *Society for The Management of Autism Related Issues in Training, Education and Resources (SMARTER)*.

Menandatangani bagi pihak KUPU SB, Ra'es KUPU SB, Yang Mulia Dr Haji Adanan bin Haji Basar. Manakala bagi pihak Kolej IGS, diwakili oleh Ketua Pegawai Eksekutif, Yang Mulia Dr Haji Azaharaini bin Haji Mohd. Jamil; dan bagi pihak SMARTER, diwakili oleh Yang Dipertua SMARTER, Yang Mulia Pengiran Zamri bin Pengiran Haji Bujang.

Penandatanganan secara maya diteruskan di antara KUPU SB dan Persatuan Kanak-Kanak Cacat (KACA), diwakili oleh Presiden KACA, Yang Mulia Dato Paduka Awang Haji Zainal bin Haji Momin.

Majlis diteruskan lagi dengan penandatanganan bersama universiti-universiti luar negara, iaitu Universitas Islam Sumatera Utara (UISU); dan Universitas Islam Negeri Alauddin Makassar.

Menandatangani bagi pihak UISU, Rektor UISU, Yang Mulia Dr H. Yanhar Jamaluddin dan bagi pihak Universitas Islam Negeri Alauddin Makassar, Yang Mulia Profesor H. Hamdan.

Seterusnya, adalah Penandatanganan Memorandum Perjanjian (MoA), yang ditandatangani di antara Dekan Fakultas Keguruan dan Ilmu Pendidikan, Yang Mulia Dr Haji Roslan bin Haji Untong bagi mewakili KUPU SB dan Yang Mulia Profesor Dr H. M. Amir Masruhim bagi pihak Universitas Malawarman.

Majlis diteruskan dengan Penyampaian Anugerah Akademik KUPU SB kepada para graduan yang

diraikan, disempurnakan oleh tetamu kehormat, Yang Mulia Setiausaha Tetap, Kementerian Hal Ehwal Ugama.

Acara turut diselajurkan dengan Penyerahan Wakaf Tarbiah daripada para Graduan Konvokesyen Ke-10, termasuk dua set Printer, alat peralatan teknologi dan barangan Surau juga Koleksi Buku Ilmiah yang diterima oleh Yang Mulia Ra'es KUPU SB.

Kemudian video sedutan perjalanan Majlis Konvokesyen Ke-11 KUPU SB turut ditayangkan.

Majlis diakhiri dengan bacaan Doa Selamat oleh Pengarah Pusat Pengkajian Kefahaman Ahli Sunnah Waljama'ah, KUPU SB, Yang Mulia Awang Haji Mohd. Azmi bin Haji Omar.

Turut hadir, Pemangku Timbalan Ra'es, Yang Mulia Dr Haji Abang Hadzmin bin Haji Abang Taha; Pemangku Penolong Ra'es, Yang Mulia Datin Dr Hajah Noor Hira binti Haji Noor Kaseh; pegawai-pegawai utama; para pensyarah; juga pegawai dan kakitangan KUPU SB.



Yang Mulia Setiausaha Tetap, Kementerian Hal Ehwal Ugama menyampaikan Anugerah Akademik bersempena Majlis Konvokesyen Ke-11 KUPU SB kepada graduan yang diraikan.

PROGRAM NADWAH TARBIAH ISLAMIAH : Sosiologi Pendidikan 'Kepimpinan Pendidikan Alaf Baru'

Jumaat, 25 Jamadilakhir 1443H bersamaan 28 Januari 2022M, episod ketujuh Program Nadwah Tarbiah Islamiah dengan konsep pengisian Bual Bicara Tarbiah Islamiah secara dalam talian ini membawakan tema perbincangan 'Sosiologi Pendidikan' dengan tajuk 'Kepimpinan Pendidikan Alaf Baru' yang disampaikan oleh Yang Mulia Dr Ismail Abbas, Penolong Kanan Profesor, Fakulti Pendidikan, Kolej Universiti Perguruan Ugama Seri Begawan (KUPU SB).

Yang Mulia Dr Ismail Abbas, menjelaskan kepimpinan merujuk kepada kepimpinan yang terbaik iaitu Rasulullah Sallallahu 'alaihi wasallam yang juga menjadi rujukan kepimpinan Islam di Negara Brunei Darussalam khususnya. Pemimpin adalah ketua-ketua yang diamanahkan seperti guru besar malahan juga guru-guru sekolah. Mereka perlu terdiri daripada pemimpin dengan kepimpinan yang cemerlang. Maka dengan itu selain kebolehan sebagai guru yang berkaliber, mereka dapat menangani pendidikan generasi baru yang sentiasa berubah mengikut perkembangan semasa. Pendidikan yang berkesan adalah penting bagi menjamin kecemerlangan negara dan dengan ini perlunya kepimpinan pendidikan alaf baru.

Keberkesanan dalam kepimpinan dapat dilihat daripada perbezaan prestasi setiap sekolah walaupun kepimpinan sekolah terdiri daripada pemimpin yang berkaliber dan cemerlang yang terpilih berdasarkan kebolehan dari segi kurikulum. Hal ini menurutnya adalah disebabkan oleh beberapa faktor iaitu penglibatan dan kesibukan kepimpinan sekolah dalam pentadbiran pengurusan sekolah yang menyebabkan pengabaian dan kurangnya perhatian terhadap pentadbiran pendidikan. Peranan sebagai pentadbiran pendidikan tidak dapat dilakukan dengan sebaiknya kerana kesibukan pemimpin sekolah akan perkara yang remeh temeh dan mengabaikan keberkesanan cara pengajaran guru dan pengendalian kelas dan pelajar.

Sifat pemimpin yang autokratif juga adalah salah satu faktor yang secara tidak langsung memberi impak kepada pengurusan pendidikan. Hubungan pemimpin dengan para guru di sekolah haruslah baik. Kerjasama pemimpin dan para guru adalah sangat penting dalam sama-sama menjalankan amanah yang diberikan untuk mencapai matlamat



sekolah. Sebarang konflik dalaman akan mengganggu tumpuan para guru dalam membina insan dan hanya memfokuskan kepada membina akal pelajar.

Maka, pemimpin sekolah tidak harus hanya menfokuskan kepada bagaimana cara untuk berjaya dalam pendidikan tanpa menekankan pendidikan akhlak. Generasi sekarang adalah generasi internet berfikir dengan cara yang berbeza dan guru perlu bertindak luar biasa dari segi pengajaran dan pentadbiran. Kerjasama di antara semua pihak perlu ada bagi memastikan tujuan adalah sama iaitu memastikan kecemerlangan pelajar dari segi pendidikan, pendidikan Islam dan pembinaan akhlak. Selain sekolah agama, KUPU SB adalah juga salah satu institusi yang sentiasa mengambil berat dalam usaha melahirkan guru yang berkepimpinan baik.

Jelas Yang Mulia Dr Ismail Abbas, kepimpinan alaf baru ini perlu dalam melahirkan pelajar yang cemerlang. Cara memimpin dalam situasi yang baru disebabkan oleh cabaran baru yang memerlukan strategi baru. Perlunya tindakan dan perubahan dalam cara pengajaran. Salah satunya adalah dengan mengambil contoh pengurusan di luar negara yang mengamalkan cara kepimpinan distributif, iaitu dengan melantik guru-guru cemerlang sebagai pemimpin dan menjadi contoh kepada guru-guru yang lemah. Mereka akan membantu dalam memastikan peningkatan prestasi dari segi pendidikan bahkan disiplin pelajar. Namun, ini bukan bermaksud mereka mengambil alih tugas sebagai ketua sekolah. Guru yang berkemahiran tinggi dan cemerlang ini akan membantu membimbing guru-guru lain agar menjadi guru yang cemerlang dengan memberikan kursus. Ia boleh dilaksanakan secara praktikal sama ada oleh guru dari sekolah yang sama atau sekolah lain.

Tegasnya, persefahaman di antara pihak pentadbir dengan guru-guru di sekolah perlu ada. Guru perlu diberi keyakinan dalam pengurusan agar mereka cepat bertindak dalam sama-sama mencapai matlamat sekolah khususnya kecemerlangan pendidikan pelajar. Pencapaian perlu dilihat bukan hanya dari segi membina jasmani dan akal semata-mata namun juga perlu menitikberatkan kecemerlangan dari segi rohani, tambahan lagi dengan penekanan Melayu Islam dan Beraja (MIB) di Negara Brunei Darussalam khususnya. Kecemerlangan dalam agama adalah perlu selain hanya berjaya dalam peperiksaan.

Nadwah Tarbiah Islamiah merupakan anjuran kerjasama Fakulti Pendidikan, Pusat Multimedia dan Teknologi dan Pejabat Antarabangsa dan Perhubungan Awam, KUPU SB. Program ini menekankan aspek kesepaduan antara teori dan praktik. Diharap perkongsian akan memberikan para pendengar kefahaman dan amalan terbaik dalam inovasi pengajaran dan pembelajaran Pendidikan Islam yang berkesan sesuai dengan perkembangan semasa dan norma baharu. Pada masa yang sama memberi manfaat kepada peserta dalam aspek pensejarahan Pendidikan Islam holistik bagi mendepani masa depan yang lebih cemerlang dalam pembangunan ummah.

CERAMAH JERAYAWARA VAKSIN KETUHANAN DAN TAWAKAL

Selasa 7 Rejab 1443H bersamaan 8 Februari 2022M, Kolej Universiti Perguruan Ugama Seri Begawan (KUPU SB) dengan kerjasama Jabatan Hal Ehwal Masjid mengadakan Jerayawara Vaksin Ketuhanan dan Tawakal di masjid-masjid utama di seluruh daerah selepas solat Maghrib sehingga solat Isya'.

Jerayawara telah giat diadakan sejak bulan Januari dan diteruskan pada 7 Rejab 1443H bersamaan 8 Februari 2022M di Masjid Raja Isteri Pengiran Anak Hajah Saleha, Kampung Rimba. Ceramah telah disampaikan oleh penceramah utamanya iaitu Yang Mulia Dr Haji Adanan bin Haji Basar, Ra'es KUPU SB.

Matlamat Jerayawara ini diadakan adalah bagi menyampaikan maklumat berkaitan dengan konsep ketuhanan iaitu bacaan-bacaan doa dalam

solat yang perlu dihayati sebagai pendinding dari wabak dan bencana. Selain itu menyeru agar para jemaah masjid mengamalkan bacaan wirid selepas solat sebagaimana yang diajarkan oleh Rasulullah Sallallahu 'alaihi wasallam agar kita semua mendapat kelebihan dari amalan tersebut. Para jemaah juga dijelaskan akan makna konsep tawakal sepenuhnya, iaitu bertawakal sepenuhnya kepada Allah Subhanahu Wata'ala setelah mengikuti Operasi Standard Prosedur (SOP), penjagaan kebersihan, kesihatan serta pengambilan Vaksin dan mengamalkan Vaksin Ketuhanan sebagai amalan harian.

Hadir bagi menyemarakkan jerayawara adalah para jemaah masjid, pensyarah-pensyarah dan mahasiswa tahun 1 dan 2 dari program Sarjana Muda Perguruan Ugama dan Diploma Tertinggi Perguruan Ugama, KUPU SB.

PROGRAM NADWAH TARBIAH ISLAMIAH : Inovasi Pendidikan Islam 'Model K.H.A.I.R'

Jumaat, 10 Rejab 1443H bersamaan 11 Februari 2022M, episod kelapan Program Nadwah Tarbiah Islamiah dengan konsep pengisian Bual Bicara Tarbiah Islamiah secara dalam talian ini membawakan tema perbincangan 'Inovasi Pendidikan Islam' dengan tajuk 'Model K.H.A.I.R' yang disampaikan oleh Yang Mulia Dr Kharhan bin Haji Jait, Pusat Ilmu Teras, dan Tenaga Akademik Fakulti Pendidikan, Kolej Universiti Perguruan Ugama Seri Begawan (KUPU SB).

Model K.H.A.I.R adalah model pengajaran berkesan yang merangkumi Kualiti Pengajaran, Had Masa

Pengajaran, Akhlak Pengajar, Insentif Pengajaran dan Relevan Aras Pengajaran. Ia adalah direka bentuk berasaskan kepada amalan pengajaran berkesan guru-guru ugama cemerlang, pakar pengamal pendidikan Islam iaitu kajian-kajian akademik, dan pakar pelaksana iaitu guru ugama berpengalaman di Negara Brunei Darussalam.

Ia adalah merupakan cetusan idea yang inovatif dan kreatif dalam pendidikan yang mana merujuk kepada sesuatu yang baru dan unik yang boleh memberi manfaat kepada masyarakat, dan institusi pendidikan. Dihasratkan ianya adalah satu model

pengajaran berkesan yang boleh menghasilkan produk perkhidmatan terbaik dengan mengambil contoh pengajaran yang baik.

Beliau juga menegaskan komponen Akhlak adalah sebagai pemangkin, pengimbang dan kayu ukur kepada model ini. Menurutnya seseorang guru perlu bijaksana yang bermaksud berilmu dan mempraktikkan ilmunya, berani terutama dalam membantu anak muridnya, mempunyai kebersihan jiwa dan keadilan. Pengukuhan akhlak akan diikuti oleh kemahiran-kemahiran yang lain. Dengan keseimbangan ini, Model K.H.A.I.R akan dapat meningkatkan tingkah laku serta motivasi pelajar dalam pembelajaran. Pada masa yang sama juga memberikan keberkesanan kepada pembelajaran.

Yang Mulia Dr Kharhan juga berharap Model K.H.A.I.R ini dapat menjadi method pengajaran yang berkesan bagi guru agama di sekolah-sekolah agama di bawah Jabatan Pengajian Islam, Kementerian Hal Ehwal Ugama, Negara Brunei

Darussalam seiring dengan tujuan pendidikan dan kehendak kerajaan. Selain menjadi satu alternatif bagi kajian-kajian berimpak tinggi tentang amalan pengajaran berkesan di institusi-institusi pendidikan juga kajian kepada teori dan model baru.

Nadwah Tarbiah Islamiah merupakan anjuran kerjasama Fakulti Pendidikan, Pusat Multimedia dan Teknologi dan Pejabat Antarabangsa dan Perhubungan Awam, KUPU SB. Program ini menekankan aspek kesepaduan antara teori dan praktik. Diharap perkongsian akan memberikan para pendengar kefahaman dan amalan terbaik dalam inovasi pengajaran dan pembelajaran Pendidikan Islam yang berkesan sesuai dengan perkembangan semasa dan norma baharu. Pada masa yang sama memberi manfaat kepada peserta dalam aspek pensejarahan Pendidikan Islam holistik bagi mendepani masa depan yang lebih cemerlang dalam pembangunan umah.

UPACARA MENAIKKAN BENDERA

Sempena Sambutan Ulang Tahun Hari Kebangsaan Negara Brunei Darussalam Kali Ke-38, Tahun 2022M



Tetamu kehormat majlis, Yang Mulia Dr Haji Adanan bin Haji Basar, Ra'es KUPU SB.

Sabtu, 18 Rejab 1443H bersamaan 19 Februari 2022M, Kolej Universiti Perguruan Ugama Seri Begawan (KUPU SB) mengadakan Majlis Menaikkan Bendera Kebangsaan Sempena Sambutan Ulang Tahun Hari Kebangsaan Negara Brunei Darussalam Ke-38, Tahun 2022M yang berlangsung di hadapan Bangunan Pentadbiran, KUPU SB.

Hadir selaku tetamu kehormat majlis ialah Yang Mulia Dr Haji Adanan bin Haji Basar, Ra'es KUPU SB.

Turut hadir ialah Yang Mulia Dr Abang Haji Hadzmin bin Haji Abang Taha, Pemangku Timbalan Ra'es, Yang Mulia Datin Dr Hajah Noor Hira binti Haji Noor Kaseh, Pemangku Penolong Ra'es serta pegawai-pegawai utama KUPU SB.

Majlis kemudian diteruskan dengan penyerahan bendera besar Negara Brunei Darussalam yang disempurnakan oleh Yang Mulia Ra'es KUPU SB dan disusuli dengan upacara menaikkan bendera, Nyanyian Lagu Kebangsaan Negara Brunei Darussalam 'Allah Peliharakan Sultan' dan laungan 'Allahu Akhbar' sebanyak tiga kali yang diketuai oleh tetamu kehormat majlis. 'Doa Peliharakan Sultan' dibacakan oleh Ketua Exco Keugamaan dan Takmir Surau 2021/2022.

Upacara menaikkan bendera yang diadakan adalah antara lain bertujuan untuk menyemarakkan lagi Majlis Sambutan Ulang Tahun Hari Kebangsaan Negara Brunei Darussalam Kali Ke-38, Tahun 2022M, menanamkan semangat patriotik dan rasa cinta terhadap tanah air serta mengukuhkan falsafah Melayu Islam Beraja dalam kalangan warga KUPU SB.



PENGAJARAN DAN PENGHAYATAN PERISTIWA ISRA' DAN MI'RAJ : Penerapan Aqidah Ahli Sunnah Waljama'ah Dalam Institusi Keluarga

Rabu 29 Rejab 1443H bersamaan 2 Mac 2022M, bersempena dengan Sambutan Ulang Tahun Hari Kebangsaan Negara Brunei Darussalam Ke-38, Tahun 2022M dan Sambutan Isra' dan Mi'raj bagi Tahun 1443H / 2022M, Pusat Kajian Fiqh al-Ussrah dengan kerjasama Pusat Penyelidikan dan Pengajian Jawi dan Kitab Turath dan Pusat Pengkajian Kefahaman Ahli Sunnah Waljama'ah, Kolej Universiti Perguruan Ugama Seri Begawan (KUPU SB) mengadakan sebuah diskusi ilmiah secara dalam talian.

Nadwah Ilmiah tersebut membincangkan pengajaran dan penghayatan peristiwa Isra' dan Mi'raj dari Kitab Turath 'Kifayatul Muhtaj' karangan Syeikh Daud Fathani berkenaan penerapan Aqidah Ahli Sunnah Waljama'ah dalam institusi keluarga.

Hadir selaku tetamu kehormat majlis ialah Yang Mulia Dr Haji Adanan bin Haji Basar, Ra'es KUPU SB.

Ahli panel terdiri daripada Pensyarah KUPU SB iaitu Yang Mulia Dr Haji Harapandi Dahri, Pengarah Pusat Penyelidikan dan Pengajian Jawi dan Kitab Turath, Yang Mulia Ustaz Haji Mohammad Azmi bin Haji Omar, Pengarah Pusat Pengkajian Kefahaman Ahli Sunnah Waljama'ah dan Yang Mulia Ustaz Hilman bin Haji Salim, Pengarah Pusat Kajian Fiqh al-Ussrah. Selaku moderator adalah Yang Mulia Dr Haji Mohammad Shahrol Azmi bin Haji Abdul Mulok, Timbalan Pengarah Pusat Penyelidikan dan Pengajian Jawi dan Kitab Turath.

Menurut Yang Mulia Dr Harapandi, di dalam Kitab Turath tersebut ada menyatakan peristiwa Isra' dan Mi'raj yang merujuk kepada al-Quran dan hadis juga qaul para sahabat dan ulama. Kitab tersebut tidak bercanggahan dengan hadis Rasulullah Sallallahu 'alaihi wasallam. Malahan di dalam kitab tersebut juga ada dinyatakan akan kebaikan dan pahala bagi orang bertasbih. Serta hikmah akan perjalanan tersebut seperti kebaikan solat. Solat telah diperintahkan oleh Allah kepada Baginda yang diwajibkan kepada umat Baginda. Antara hikmah melakukan solat ialah terbebas dari perilaku yang tidak baik dan menghapuskan dosa dan khilaf. Solat juga memberi ketenangan dan ketenteraman jiwa bagi pelakunya.

Manakala Yang Mulia Ustaz Haji Mohammad Azmi menjelaskan dari perspektif akidah Ahli Sunnah



Tetamu kehormat majlis, Yang Mulia Dr Haji Adanan bin Haji Basar, Ra'es KUPU SB bersama Ahli-ahli panel mengadakan diskusi ilmiah secara dalam talian.

Waljama'ah, Isra' dan Mi'raj adalah mukjizat dan ianya wajib dipercayai dan diimani. Mukjizat yang akal fikiran tidak mampu menjangkau. Diangkatnya Rasulullah adalah untuk mengagungkan Allah dan mensabitkan solat. Selain itu Mi'raj bermaksud agar kita mengimani akan 20 sifat-sifat Allah dan pentingnya memahaminya. Beliau juga menasihatkan perlunya berhati-hati dalam memilih kitab-kitab yang muktabar yang menjelaskan kisah perjalanan Rasulullah Sallallahu 'alaihi wasallam ini. Perlunya merujuk kepada buku hadis yang sahih antaranya seperti sahih Muslim, Imam Nawawi dan Ibn Qayyim.

Yang Mulia Ustaz Hilman pula menerangkan terdapatnya nilai-nilai akidah dan keimanan yang boleh diambil dan diterapkan dalam institusi kekeluargaan dari peristiwa tersebut kerana ia memberi pengajaran dalam pembentukan keluarga yang sakinah, soleh dan bertakwa. Menurutnya secara umum untuk mentarbiah para anak remaja, ibu bapa harus menanamkan nilai-nilai keimanan, nilai-nilai ibadah serta nilai-nilai pensucian dan penyerahan diri kepada Allah Subhanahu Wata'ala. Jelasnya lagi, nilai keimanan adalah seperti beriman kepada kewujudan dan kekuasaan Allah, beriman kepada al-Quran, nabi-nabi, kebenaran hari qiamat dan beriman kepada qadha' dan qadar Allah. Nilai-nilai ketekunan adalah seperti beribadah, mendirikan solat, suka berinfaq dan bersedekah, taat kepada perintah dan meninggalkan segala yang ditegah umpamanya zina, berlaku zalim, mengumpat dan mengambil hak orang lain. Dari sudut yang lain pula, ibu bapa hendaklah mendidik anak-anak dengan nilai-nilai ketakwaan, penyerahan diri kepada Allah terutama ketika ditimpa musibah atau perkara-perkara

yang meresahkan dan menakutkan. Maka dengan ini kita akan mampu mencalak sebuah keluarga yang sakinah, mawaddah dan rahmah di bawah petunjuk Allah. Tegasnya, mulalah mengajarkan kepada anak-anak agar sentiasa berserah kepada Allah, kerana hanya kepadaNya tempat sebaik mengadu. Berikan perhatian terhadap anak-anak dalam perkara penyucian hati iaitu dengan mengambil iktibar akan kisah Baginda Rasulullah. Juga didiklah anak agar sentiasa bersikap baik, ikhlas, redha dan biasakan bersedekah.

Turut hadir bagi memeriahkan majlis ilmu ini adalah pegawai-pegawai utama, kakitangan, mahasiswa-mahasiswi KUPU SB, para jemputan dan orang ramai.

HALAQAH SYARIAH BIMBINGAN SOLAT Sempena Sambutan Isra' dan Mi'raj 1443H



Jumaat, 1 Syaaban 1443H bersamaan 4 Mac 2022M. Solat adalah rukun kedua daripada rukun Islam yang lima sebagaimana sabda Rasulullah Shallallahu 'alaihi wasallam yang bermaksud: "Islam ditegakkan di atas lima perkara, iaitu bersyahadah bahawa tiada tuhan yang disembah melainkan Allah dan bahawa Nabi Muhammad ini Rasulullah,

mendirikan solat, mengeluarkan zakat, berpuasa di bulan Ramadan dan mengerjakan haji bagi yang berkemampuan menunaikannya". - Riwayat Bukhari dan Muslim. Justeru itu Islam tidak akan tertegak pada diri seseorang melainkan tertegaknya kesemua rukun Islam.

Menyedari akan pentingnya menunaikan ibadat solat secara sempurna, Kolej Universiti Perguruan Ugama Seri Begawan (KUPU SB) melalui Fakulti Syariah dengan kerjasama Jabatan Hal Ehwal Masjid, Kementerian Hal Ehwal Ugama, Negara Brunei Darussalam telah mengadakan Halaqah Syariah Bimbingan Solat Sempena Sambutan Isra' dan Mi'raj 1443H selama empat hari iaitu pada 4, 8, 11 Mac 2022M dan berakhir pada 15 Mac 2022M bertempat di masjid-masjid terpilih di Negara Brunei Darussalam yang diadakan selepas solat fardu Maghrib.

Objektif Nadwah Ilmiah ini diadakan selain untuk menyemarakkan Sambutan Ulang Tahun Hari Kebangsaan Negara Brunei Darussalam Ke-38, Tahun 2022M juga adalah bagi mengukuhkan kefahaman Ahli Sunnah Waljama'ah dalam kalangan masyarakat dan mahasiswa / mahasiswi KUPU SB terutama dalam perkara yang berkaitan dengan pegangan aqidah melalui peristiwa Isra' dan Mi'raj. Serta mendedahkan kepentingan menghidupkan karya-karya turath ulama silam yang muktabar dalam memahami nas-nas agama. Ia juga diharap dapat memberigakan kepentingan keluarga sebagai sebuah institusi pendidikan yang berperanan dalam membentuk syakhsiah yang soleh dan muhsin berlandaskan pegangan aqidah Ahli Sunnah Waljama'ah.

Beberapa masjid menjadi tumpuan bagi pelaksanaan halaqah syariah bimbingan solat. Bagi sesi pertama diadakan di Masjid Kampung Kilanas, Daerah Brunei Muara yang disampaikan oleh Yang Mulia Dr Haji Adanan bin Haji Basar, Ra'es KUPU SB, Masjid Kampung Sungai Teraban, Daerah Belait yang disampaikan oleh Yang Mulia Ustaz Haji Md Syahiran bin Haji Md Sofian, Penolong Pensyarah, Fakulti Syariah, KUPU SB dan Masjid Kampung Lubok Pulau, Daerah Tutong yang disampaikan oleh Yang Mulia Ustaz Azman bin Kassim, Penolong Pensyarah, Fakulti Syariah, KUPU SB.

Halaqah Syariah Bimbingan Solat berkenaan diteruskan pada sesi kedua iaitu pada hari Selasa, 5 Syaaban, 1443H bersamaan 8 Mac 2022M di Daerah Brunei Muara. Beberapa masjid di Daerah Brunei Muara yang menjadi tumpuan bagi pelaksanaan halaqah syariah bimbingan solat tersebut ialah di Masjid Kampung Limau Manis disampaikan oleh Yang Mulia Dr Haji Roslan bin Haji Untong, Dekan Fakulti Pendidikan, KUPU SB, Masjid Kampung Masin disampaikan oleh Yang Mulia Ustaz Haji Mohammad Azmi bin Haji Omar, Pengarah Pusat Pengkajian Kefahaman Ahli Sunnah Waljama'ah, KUPU SB, Masjid DPMM Pengiran Muda Haji Al-Muhtadee Billah, Kampung Tamoi oleh Yang Mulia Dr Haji Mohd Shahrol Azmi bin Haji Abdul Muluk, Penolong Pensyarah, Pusat Ilmu Teras, KUPU SB, Masjid Kampung Sungai Buloh oleh Yang Mulia Dr Haji Harapandi Dahri, Pengarah Pusat Penyelidikan dan Pengajian Jawi dan Kitab Turath dan Masjid Pengiran Muda Abdul Malik,

Kampung Tungku Katok disampaikan oleh Yang Mulia Dr Haji Sham bin Haji Amin, Pegawai Hal Ehwal Masjid Tingkat Khas, Pusat Pengajian Fiqh al-Ushrah, KUPU SB.

Sesi ketiga diteruskan lagi pada hari Jumaat, 8 Syaaban 1443H bersamaan 11 Mac 2022M di Masjid Haji Abdul Azim, Kampung Luagan Dudok, Daerah Tutong yang disampaikan oleh Yang Mulia Dr Mikdar Rusdi, Penolong Kanan Profesor, Fakulti Usuluddin, KUPU SB, Masjid Pekan Seria, Daerah Belait disampaikan oleh Yang Mulia Prof Madya Dr Mohd Zahiri bin Awang Mat, Profesor Madya, Fakulti Pendidikan, KUPU SB, Masjid Kampung Labu Estate, Daerah Temburong yang disampaikan oleh Yang Mulia Dr Ahmad Yunus, Penolong Kanan Profesor, Fakulti Pendidikan, Masjid Pekan Bangar, Daerah Temburong yang disampaikan oleh Yang Mulia Ustaz Hilman bin Haji Salim, Pengarah Pusat Kajian Fiqh al-Ushrah.

Manakala sesi keempat dan terakhir diadakan pada hari Selasa, 12 Syaaban, 1443H bersamaan 15 Mac 2022M. Masjid-masjid yang menjadi tumpuan bagi pelaksanaan halaqah syariah bimbingan solat tersebut ialah di Masjid Kampung Batu Marang disampaikan oleh Yang Mulia Dr Haji Ahmad Asri Lubis, Pensyarah



Pusat Bahasa, KUPU SB, Masjid Kampung Bunut yang disampaikan oleh Yang Mulia Dr Haji Matussein bin Haji Jumat, Penolong Profesor, Fakulti Usuluddin dan Masjid Jefri Bolkiah, Kampung Batong oleh Yang Mulia Ustaz Hilman bin Haji Salim, Pengarah Pusat Kajian Fiqh al-Ushrah.


Antara objektif halaqah tersebut diadakan adalah bagi meningkatkan tahap kefahaman dalam kalangan jemaah mengenai kewajipan melaksanakan solat fardu lima waktu dan pada masa yang sama menyempurnakan solat fardu dengan betul menurut Mazhab Syafi'e. Ia juga diharapkan dapat mengukuhkan ketakwaan para jemaah yang hadir dengan menjaga solat fardu lima waktu dan istiqomah dalam mendirikan solat secara berjemaah bersama keluarga dan masyarakat.

NADWAH TARBIAH ISLAMIAH KHAS : Menjayakan Wawasan Negara Melalui Pendidikan

Ad, 3 Syaaban 1443H bersamaan 6 Mac 2022M, Sambutan Ulang Tahun Hari Kebangsaan Negara Brunei Darussalam Ke-38 disemarakkan dengan Nadwah Tarbiah Islamiah yang dikendalikan oleh Fakulti Pendidikan, Kolej Universiti Perguruan Ugama Seri Begawan (KUPU SB) bersama dengan Nur Islam FM, Radio Televisyen Brunei. Ianya disiarkan secara langsung di Nur Islam FM dan juga YouTube.

Selaku moderator adalah Yang Mulia HM Jaya Metussin. Manakala ahli panel terdiri daripada Yang Mulia Dr Ismail Abbas, Penolong Kanan Profesor Fakulti Pendidikan; Yang Mulia Norapizah Zalani, Penolong Pensyarah Fakulti Pendidikan; dan Dr Siti Astri @ 'Alya Nadhirah binti Haji Moxsin, Alumni KUPU SB.

Nadwah membincangkan berkenaan cara menjayakan wawasan Negara Melalui Pendidikan. Objektif Nadwah ini diadakan antaranya adalah untuk menggerakkan minda para belia dan



Para panel yang dikendalikan oleh Fakulti Pendidikan, Kolej Universiti Perguruan Ugama Seri Begawan bersama dengan Nur Islam FM, Radio Televisyen Brunei.

membincangkan hal berkenaan wawasan negara dari perspektif belia agar belia dapat mengeluarkan hujah-hujah yang bernas berasaskan faktor agama secara profesional dalam membincangkan isu-isu berkaitan. Diharap juga akan dapat memupuk semangat para belia di negara ini supaya lebih beriltizam dan menghayati konsep ilmu dalam pembangunan ummah sepertimana yang dianjurkan oleh agama Islam.

DAKWAH MELALUI TADABBUR AL-QURAN, AL-HADIS DAN PENGAJIAN KITAB TURATH Di Masjid-Masjid Negara Brunei Darussalam

Ahad, 3 Syaaban 1443H bersamaan 6 Mac 2022M, aktiviti dakwah merupakan amalan pertama yang diperintahkan Allah kepada Malaikat Jibril dengan menyampaikan seruan dan ajakan kepada Baginda Rasulullah Sallallahu 'alaihi wasallam. Kemudian Nabi pun menerusi dakwah beliau kepada para sahabat yang termasuk as-sabiqunal Awwalun. Selepas Baginda Rasul wafat amalan dakwah dijalankan oleh para sahabat, tabi'in, taibut taibiin hingga kini para Ulama sebagai pewaris Nabi meneruskannya.

Memetik kembali kepada titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam sempena Majlis Sambutan Isra' dan Mi'raj Peringkat Negara Tahun 1438 Hijrah / 2017 Masihi di Dewan Plenary, Pusat Persidangan Antarabangsa, Berakas pada hari Isnin, 27 Rejab 1438 Hijrah / 24 April 2017 Masihi baginda bertitah :

“Dalam usaha memelihara akidah, selain melalui Pendidikan, langkah memperkasa dakwah juga adalah mustahak. Kerana dakwah berperanan besar untuk menyuntik kesedaran beragama atau kesedaran berakidah. Sebab itu kalau dakwah lemah, maka akan lemah pula kesedaran ummah. Jadi pihak berkenaan, hendaklah menjadikan Pendidikan agama dan dakwah itu sebagai keutamaan, bukannya sebagai rutin semata-mata, tetapi keduanya memerlukan penumpuan serius untuk sentiasa diperkemas dan diperkasa.”

Dalam titah yang lain sempena Majlis Konvokesyen Ketiga Kolej Universiti Perguruan Ugama Seri Begawan, pada 26 Muharam 1435H bersamaan 30 November 2013M. Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddin Sa'adul Khairi Waddien, Sultan dan Yang Di-Pertuan Negara Brunei Darussalam bertitah :

“Beta berpendapat tulisan Jawi dan pengajian Kitab Turath ini adalah perlu dipertahankan bahkan mustahak diperkasakan, kerana Jawi adalah merupakan identiti bangsa, sementara pengajian Kitab Turath pula adalah merupakan warisan ilmu Islam yang sangat berharga. Ke arah itu, sesuai dengan keunikan KUPU SB sebagai peneraju pendidikan Islam, maka Beta melihat

KUPU SB adalah institusi yang paling sesuai untuk menawarkan atau mengendalikan program-program akademik di bidang tulisan Jawi dan Kitab Turath sebagai sifatnya tunggal kecemerlangan Islam di negara ini”.

Sehubungan itu, bersempena dengan Sambutan Ulang Tahun Hari Kebangsaan Negara Brunei Darussalam Ke-38, Tahun 2022M dan Sambutan Isra' dan Mi'raj bagi Tahun 1443H dengan anjuran kerjasama Fakulti Usuluddin, KUPU SB, Pusat Penyelidikan dan Pengajian Jawi dan Kitab Turath, KUPU SB, Jabatan Hal Ehwal Masjid, KHEU dan masjid-masjid terpilih di seluruh negara telah menganjurkan sebuah program Dakwah Tadabbur Al-Quran, Al-Hadis dan Pengajian Kitab Turath di masjid-masjid yang terpilih di seluruh negara. Sasaran program ini terdiri daripada penduduk, belia, muallaf, muslimin, muslimah dan jemaah masjid yang terpilih.

Usaha-usaha ini adalah bagi meningkatkan kefahaman masyarakat Islam di Negara Brunei Darussalam tentang amalan ugama Islam menerusi Tadabbur al-Quran, al-Hadis dan Pengajian Kitab Turath yang masih berkurangan. Mengetahui peranan penting dalam pengetahuan al-Quran dan al-Hadis serta memahami isi-isi yang terkandung dalam kitab Turath adalah sebahagian dari usaha KUPU SB dalam memberikan rujukan keugamaan yang dapat dipertanggungjawabkan.

Matlamat khusus program ini adalah untuk memperluaskan sasaran dakwah ke seluruh negara melalui masjid-masjid. Menyebarluaskan tadabbur al-Quran, al-Hadis dan Pengajian Kitab Turath dalam kalangan masyarakat awam di Negara Brunei Darussalam. Selain itu juga, program ini bertujuan untuk mengimarahkan masjid-masjid di Negara Brunei Darussalam melalui tadabbur al-Quran, al-Hadis dan Pengajian Kitab Turath di samping mendedahkan masyarakat dengan tadabbur al-Quran, al-Hadis dan Kitab-Kitab Turath sebagai rujukan kehidupan seharian.

Program ini telah dijalankan secara berterusan di seluruh masjid di Negara Brunei Darussalam mengikut kesesuaian keadaan iaitu selepas solat fardu Maghrib hingga solat Isyak bagi pensyarah lelaki. Manakala pada hari Sabtu sebelah pagi bagi pensyarah perempuan.

MAJLIS PENYAMPAIAN HADIAH Bagi Pertandingan Musabaqah Menghafaz Al-Quran Sempena Ulang Tahun Hari Kebangsaan Negara Brunei Darussalam Kali Ke-38 dan Sambutan Isra' dan Mi'raj



Khamis, 7 Syaaban 1443H bersamaan 10 Mac 2022M, Kolej Universiti Perguruan Ugama Seri Begawan telah mengadakan Majlis Penyampaian Hadiah secara maya bagi Pertandingan Musabaqah Menghafaz Al-Quran Sempena Sambutan Ulang Tahun Hari Kebangsaan Negara Brunei Darussalam Kali Ke-38 dan Sambutan Isra' dan Mi'raj bagi Tahun 1443H / 2022M.

Hadir selaku tetamu kehormat majlis ialah Yang Mulia Dr Haji Adanan bin Haji Basar, Ra'es KUPU SB. Turut hadir ialah pegawai-pegawai utama, pensyarah-pensyarah, kakitangan serta mahasiswa-mahasiswi KUPU SB.

Acara dimulakan dengan bacaan surah al-Fatihah diketuai oleh Yang Mulia Awang Ahmad Zulhakim bin Abu Bakar, Mahasiswa Tahun 2, Program Diploma Tertinggi Perguruan Ugama. Majlis dilanjutkan dengan bacaan Asmaul Husna dan Nyanyian Lagu Kebangsaan Negara Brunei Darussalam 'Allah Peliharakan Sultan' beramai-ramai.

Ucapan alu-aluan majlis penyampaian hadiah tersebut disampaikan oleh Pengerusi Majlis iaitu Yang Mulia Muhammad Nursyazwi Zawawi bin Shahri, Mahasiswa Tahun 2, Program Diploma Tertinggi Perguruan Ugama.

Majlis diteruskan lagi dengan ulasan dan pengumuman pemenang dari hakim musabaqah menghafaz al-Quran yang disampaikan oleh Yang Mulia Ustaz Mohamed Noor bin Haji

Ibrahim, Pegawai Pelajaran, KUPU SB dan Hakim Pertandingan Mereka Bentuk Baju dan Pertandingan Filem Pendek yang disampaikan oleh Yang Mulia Ustaz Ali Omar Saifuddin bin Haji Ali Amat, Pegawai Kerohanian, Bahagian Hal Ehwal Pelajar, KUPU SB.

Johan Pertandingan Musabaqah Menghafaz Al-Quran iaitu Yang Mulia Mohammad Syariff Wafiuddin bin Jemain, Mahasiswa Tahun 1, Program Sarjana Muda Perguruan Ugama. Manakala johan pertandingan mereka bentuk baju iaitu Yang Mulia Ahmad Naufal Azizi bin Mohammad Norisham, Mahasiswa Tahun 4, Program Sarjana Muda Perguruan Ugama dan Pertandingan Filem Pendek dengan tema 'Berbakti Kepada Negara' yang dihasilkan oleh Yang Mulia Awang Muslim bin Mahadi, Mahasiswa Tahun 3, Program Diploma Tertinggi Perguruan Ugama menjuarai pertandingan tersebut.

Majlis diakhiri dengan bacaan Doa Selamat yang diketuai oleh Yang Mulia Muhammad Syarkawi bin Mardy, Mahasiswa Tahun 1, Diploma Tertinggi Perguruan Ugama.

Beberapa aktiviti dan majlis ilmu telah diungkuhkan oleh Fakulti dan Pusat KUPU SB bagi menyemarakkan lagi Sambutan Ulang Tahun Hari Kebangsaan Negara Brunei Darussalam Ke-38, Tahun 2022M dan Sambutan Isra' dan Mi'raj termasuk Majlis Forum, Aktiviti Menuai Padi, Eksplorasi Bukit Kitani dan ATV di Daerah Temburong serta Halaqah Syariah Bimbingan Solat yang diadakan di masjid-masjid terpilih di seluruh negara.

KAEDAH PENGAJARAN MELAYU ISLAM BERAJA DALAM MENCAPAI WAWASAN 2035 : Program Pendidikan Melayu Islam Beraja

Juma'at, 15 Syaaban 1443H bersamaan 18 Mac 2022M, Program Pendidikan Melayu Islam Beraja untuk kali kedua anjuran Kolej Universiti Perguruan Ugama Seri Begawan (KUPU SB) dengan kerjasama Pejabat Sekretariat Majlis Tertinggi Melayu Islam Beraja, Negara Brunei Darussalam diteruskan secara dalam talian.

Program dianjurkan dengan matlamat untuk mengukuhkan dan memantapkan lagi kefahaman terhadap konsep Melayu Islam Beraja (MIB) bagi menjunjung tinggi titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam sempena Majlis Bersama Rakyat dan Penduduk Negara Brunei Darussalam di United Kingdom dan Ireland Utara pada 1 Rabiulawal 1437 bersamaan 13 Disember 2015 yang menekankan peri pentingnya sistem nilai sebagai tunjang dalam Melayu Islam Beraja (MIB). Juga menjunjung titah Baginda yang menjelaskan MIB sebagai pakaian para pemimpin dan orang Brunei sebagaimana titah baginda sempena Persidangan Khas Majlis Mesyuarat Menteri-Menteri Kabinet pada 21 Jamadilawal 1439 bersamaan 7 Februari 2018.

Bual bicara pendidikan Melayu Islam Beraja dengan tema 'Kaedah Pengajaran Melayu Islam Beraja dalam mencapai Wawasan Negara 2035' disampaikan oleh Yang Mulia Dayang Norafizah binti Haji Zalani, Penolong Pensyarah Fakulti Pendidikan, KUPU SB.

Yang Mulia Ustazah Norapizah menerangkan matlamat wawasan 2035 adalah sebagai hala tuju negara dalam menghadapi cabaran-cabaran dunia yang memerlukan persiapan diri dengan usaha yang berterusan dengan berpaksikan kepada Melayu Islam Beraja agar kemakmuran negara terjamin. Maka perlunya kaedah pengajaran dan pembelajaran abad ke-21 dalam melestarikan nilai-nilai MIB.

Beliau juga menjelaskan MIB merupakan mekanisme atau 'tool' untuk mencegah dan



Program Pendidikan Melayu Islam Beraja (MIB) yang diadakan secara dalam talian.

mengawal tingkah laku yang melanggar peraturan dan undang-undang pengamalan dan penghayatan MIB dan adalah perisai atau anti virus untuk menepis segala pengaruh-pengaruh negatif dan perkara-perkara yang tidak baik.

Menurutnya lagi, kaedah pengajaran dan pembelajaran abad ke-21 dapat dilihat keberkesannya dalam sistem SPN21 yang mana guru memainkan peranan penting dalam pembentukan akhlak pelajar. Tegasnya guru perlu menerapkan dan mengaplikasikan Pendidikan Melalui Teladan iaitu guru perlu melaksanakan terlebih dahulu sebelum mengajarkannya kepada pelajar.

Tambahnya lagi pelajar juga perlu diajar agar memelihara, memakai, memupuk MIB kerana ia adalah tanggungjawab semua masyarakat khususnya para belia dan pelajar agar mereka akan terus melestarikan nilai-nilai MIB dan ketamadunan Negara Zikir Brunei Darussalam.

Objektif program diadakan adalah bagi memberigakan dan memberikan kefahaman akan kepentingan pendidikan gagasan Negara Zikir dan Konsep Melayu Islam Beraja selain memperkukuhkan penghayatan dan pengamalan Negara Zikir Melayu Islam Beraja bagi warga perkhidmatan awam dan masyarakat negara ini. Serta menyemai nilai dan jati diri kebruneian melalui gagasan Negara Zikir dan Konsep Melayu Islam Beraja.

Rabu, 27 Syaaban 1443H bersamaan 30 Mac 2022M, Mu'tamar Bahasa Arab Kebangsaan Brunei (MuBaAraK) bagi tahun 1443H telah diadakan secara dalam talian dihadiri lebih daripada 190 orang. Mu'tamar ini merupakan acara tahunan anjuran bersama Kolej Universiti Perguruan Ugama Seri Begawan (KUPU SB), Jabatan Pengajian Islam (JPI), Universiti Islam Sultan Sharif Ali (UNISSA), Rabitah Antarabangsa Alumni Al-Azhar Brunei Darussalam dan Persatuan Bahasa Arab (PBA).

Ucapan Khas disampaikan oleh tetamu kehormat majlis, Yang Mulia Dr Haji Adanan bin Haji Basar, Ra'es Kolej Universiti Perguruan Ugama Seri Begawan membincangkan mengenai 'Menjunjung Keprihatinan Raja Soleh Terhadap Bahasa Zikir di Negara Zikir'. Menurut beliau pentingnya menjunjung bahasa Arab sebagaimana Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam sendiri yang mengutamakan dan menunjukkan keprihatinan terhadap perkembangan Bahasa Arab di Negara Brunei Darussalam.

Tambahnya, keprihatinan ini juga dapat dilihat sejak pemerintahan Almarhum Sultan Haji Omar 'Ali Saifuddin yang menyediakan dan mendukung Sekolah Arab dari peringkat permulaan. Jelasnya antara usaha Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam dalam menjunjung Bahasa Arab adalah memperkenankan penubuhan Sekolah Arab, melawat sekolah-Sekolah Arab dan memastikan pemeraksanaan Bahasa Arab di Negara Brunei Darussalam.

Tegas Yang Mulia Dr Haji Adanan, perlunya usaha rakyat dalam mendukung dan memperkasa Bahasa Arab di Negara Brunei Darussalam. Beberapa usaha telah dilakukan oleh KUPU SB dengan menawarkan program Pendidikan Bahasa Arab dan kursus-kursus berkaitan dengan penambahbaikan kaedah pengajaran dan pembelajaran Bahasa Arab di sekolah-sekolah. Orang ramai adalah diseru untuk membuat tindakan dalam mempelbagaikan turuq tadrīs dan juga mengambil kebaikan multimedia

untuk memperkukuhkan Bahasa Arab di Negara Brunei Darussalam.

Mu'tamar diteruskan dengan perkongsian maklumat perkembangan pengajaran Bahasa Arab di antara institusi di Negara Brunei Darussalam oleh wakil-wakil daripada Pusat Bahasa, KUPU SB; Fakulti Bahasa Arab, UNISSA; JPI; Institut Tahfiz Al-Quran Sultan Haji Hassanal Bolkiah dan Rabitah Antarabangsa Alumni Al-Azhar Brunei Darussalam. Perkongsian melihat kepada perkembangan bahan rujukan pengajaran Bahasa Arab, teknik pengajaran Bahasa Arab dan keberkesannya dalam meningkatkan mutu pembelajaran pelajar di institusi berkenaan.

Pengumuman pemenang video pendek Bahasa Arab pelajar KUPU SB Tahun 2 diselajurkan dalam majlis tersebut. Video-video pendek Bahasa Arab bolehlah ditonton menerusi Instagram rasmi Pusat Bahasa KUPU SB di @pusatbahasa_kupusb.

MuBaAraK 1443H merupakan persidangan kali ketiga sejak kali pertama ia diadakan pada tahun 2019. Pada tahun ini pertama kalinya ia diadakan bersempena dengan bulan Bahasa Arab (Negara Brunei Darussalam) merujuk kepada tausiah MuBaAraK 1442H iaitu menjadikan bulan Syaaban setiap tahun sebagai Bulan Bahasa Arab, dan MuBaAraK 1443H dan seterusnya akan diadakan dalam bulan Syaaban setiap tahun.

Mu'tamar diharap dapat mengeratkan kerjasama pelbagai pihak di Negara Brunei Darussalam dalam mengembangkan peluang dan mutu pengajaran Bahasa Arab dalam mengukuhkan jati diri negara zikir. Ia juga bertujuan agar menjadi wadah perkongsian maklumat berkenaan perkembangan Pengajaran Bahasa Arab antara institusi di Negara Brunei Darussalam. Juga perkongsian kaedah pengajaran Bahasa Arab dan meningkatkan kesedaran terhadap pengajaran Bahasa Arab dan minat dalam pembelajarannya di kalangan masyarakat. Serta memantau dan menilai Ru'yah MuBaAraK (wawasan Bahasa Arab Brunei) dan rancangan pelbagai kerjasama antara institusi.

PROGRAM NADWAH TARBIAH ISLAMIAH : Kepelbagaian Pentaksiran Di Dalam Meningkatkan Keberkesanan Pengajaran dan Pembelajaran

Jumaat, 22 Syaaban 1443H bersamaan 25 Mac 2022M, episod Kesebelas Program Nadwah Tarbiah Islamiah dengan konsep pengisian Bual Bicara Tarbiah Islamiah secara dalam talian kali ini membawakan tema perbincangan ‘Kepelbagaian Pentaksiran Di Dalam Meningkatkan Keberkesanan Pengajaran dan Pembelajaran’ yang disampaikan oleh Yang Mulia Dr Hajah Norwati binti Haji Abu Bakar, Timbalan Dekan Fakulti Pendidikan, Kolej Universiti Perguruan Ugama Seri Begawan (KUPU SB).

Yang Mulia Dr Hajah Norwati menjelaskan pentaksiran perlu dilaksanakan dalam pembelajaran dan pengajaran agar guru dapat menilai kefahaman pelajar dengan lebih berkesan. Tambahnya, ia juga mendidik pelajar kaedah mengaplikasikan ilmu yang dipelajari atau diperolehi di dalam kelas ke kehidupan yang sebenar, pada masa pelajar peka akan tahap kefahaman mereka terhadap ilmu yang diajarkan.

Dalam bual bicara itu, Yang Mulia Dr Hajah Norwati, membincangkan perbezaan pentaksiran alternatif dan *traditional*. Menurutnya pendekatan alternatif adalah berbeza dengan pentaksiran *traditional* yang lebih banyak kepada penilaian pelajar menggunakan ujian dan peperiksaan. Jelasnya ia adalah pendekatan yang menggunakan pelbagai aktiviti dan penilaian secara meluas yang membantu guru mengesan tahap kefahaman dan perkembangan pelajar dari segi kognitif, efektif dan psikomotor.

Tambahnya lagi, perbezaan pentaksiran *traditional* hanya melihat kebolehan pelajar menjawab, mengingat, memahami namun penaksiran alternatif melihatkan kepada hasil kerja pelajar dari pemahaman mereka akan konsep dan teori yang dipelajari di dalam kelas yang melibatkan pelajar untuk menilai kemahiran sendiri (*self assessment*) dan meningkatkan kemahiran abad ke-21 para pelajar. Yang Mulia Dr Hajah Norwati menjelaskan keberkesanan penggunaan kaedah ini, antaranya ia dapat memberi kesan dari segi kognitif, efektif dan psikomotor. Pelajar juga akan memperoleh kemahiran abad ke-21 seperti berfikir kritikal, nilai kerjasama, kemahiran berkomunikasi dan literasi media, teknologi dan informasi. Kemahiran kehidupan yang berkaitan dari kebolehdurusan sebagai pemimpin, alam pekerjaan dan bersosial.

Mengikut kajian awal oleh Yang Mulia Dr Hajah Norwati menunjukkan ramai guru yang tidak mengetahui kaedah pengajaran menggunakan pentaksiran alternatif dan ada juga di antaranya kurang faham yang menyebabkan kurangnya pengaplikasian di dalam kelas. Dapatan juga menunjukkan kurangnya pengalaman para guru dalam cara mengendalikan selain kekurangan masa dan kreativiti.

Beliau mencadangkan agar pendekatan ini digunakan terutama sekali ketika pembelajaran secara dalam talian. Guru perlu menggunakan platform yang sedia ada dan membuat penambahbaikan agar pembelajaran dan pengajaran berkesan. Guru boleh merancang tujuan pengajaran dan menentukan perkembangan pelajar dari segi kognitif, efektif dan psikomotor. Juga menentukan design dan penilaian berbentuk formatif dan summatif yang sesuai. Perancangan yang baik akan menghasilkan pembelajaran dan pengajaran berkesan.

Beliau juga memberikan contoh kaedah alternatif seperti mengarahkan pelajar menghasilkan produk seperti portfolio, poster, sku skrap, permainan, hasil komputer dan kaji selidik. Selain itu bagi meningkatkan prestasi bolehlah melakukan aktiviti, demonstrasi, perbincangan, lakonan dan lawatan yang mana pelajar akan memberikan laporan atau komen. Manakala pendekatan bagi meningkatkan kemahiran pula adalah dengan melakukan pemerhatian, pemetaan, persidangan dan jurnal.

Nadwah Tarbiah Islamiah merupakan anjuran kerjasama Fakulti Pendidikan, Pusat Multimedia dan Teknologi dan Pejabat Antarabangsa dan Perhubungan Awam, KUPU SB. Program ini menekankan aspek kesepaduan antara teori dan praktikal. Diharap perkongsian akan memberikan para pendengar kefahaman dan amalan terbaik dalam inovasi pengajaran dan pembelajaran Pendidikan Islam yang berkesan sesuai dengan perkembangan semasa dan norma baharu. Pada masa yang sama memberi manfaat kepada peserta dalam aspek pensejarahan Pendidikan Islam holistik bagi mendepani masa depan yang lebih cemerlang dalam pembangunan ummah.


PROGRAM PENDIDIKAN MELAYU ISLAM BERAJA BAGI INSTITUSI PENGAJIAN TINGGI : Satu Penelitian

Juma'at, 29 Syaaban 1443H bersamaan 1 April 2022M, Program Pendidikan Melayu Islam Beraja untuk kali ketiga anjuran Kolej Universiti Perguruan Ugama Seri Begawan (KUPU SB) dengan kerjasama Pejabat Sekretariat Majlis Tertinggi Melayu Islam Beraja, Negara Brunei Darussalam diteruskan secara dalam talian.

Program dianjurkan dengan matlamat untuk mengukuhkan dan memantapkan lagi kefahaman terhadap konsep Melayu Islam Beraja (MIB) bagi menjunjung tinggi titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam sempena Majlis Bersama Rakyat dan Penduduk Negara Brunei Darussalam di United Kingdom dan Ireland Utara pada 1 Rabiulawal 1437H bersamaan 13 Disember 2015M yang menekankan pentingnya sistem nilai sebagai tunjang dalam Melayu Islam Beraja (MIB). Juga menjunjung titah Baginda yang menjelaskan MIB sebagai pakaian para pemimpin dan orang Brunei sebagaimana titah baginda sempena Persidangan Khas Majlis Mesyuarat Menteri-Menteri Kabinet pada 21 Jamadilawal 1439H bersamaan 7 Februari 2018M.

Bual bicara pendidikan Melayu Islam Beraja kali ini membincangkan 'Kurikulum Kursus Melayu Islam Beraja Di Institusi Pengajian Tinggi : Satu Penelitian' disampaikan oleh Yang Mulia Dr Haji Roslan bin Haji Untong, Dekan Fakulti Pendidikan, KUPU SB. Selaku Moderator ialah Yang Mulia Norhazimah Nadzirah binti Haji Misli, Penolong Pensyarah, Pusat Bahasa.

Yang Mulia Dr Haji Roslan menerangkan kurikulum, pengajaran dan pembelajaran adalah tiga perkara yang saling berkaitan dengan tugas dan tanggungjawab guru. Ini adalah meliputi strategi, kaedah dan pendekatan yang digunakan oleh guru dalam menyampaikan isi kandungan pelajaran. Tambahnya, pembelajaran pelajar hanya nampak berkesan jika adanya perubahan dari segi pengetahuan, kemahiran serta sikap pelajar itu.



Bual bicara pendidikan MIB yang diadakan secara dalam talian

Berdasarkan kepada penelitian yang dibuat, beliau menyatakan bagi memastikan pembelajaran yang berkesan guru perlu menyediakan bahan teks, mempersembahkan semula idea dengan pemilihan kaedah pengajaran yang bersesuaian dengan keperluan pelajar. Selain itu menerapkan beberapa kemahiran generik dalam pengajaran MIB yang juga diterapkan dalam diri pelajar iaitu kemahiran komunikasi, kepimpinan, kerja berpasukan, penyelesaian masalah dan fleksibiliti.

Objektif program diadakan adalah bagi memberigakan dan memberikan kefahaman akan kepentingan pendidikan gagasan Negara Zikir dan Konsep Melayu Islam Beraja selain memperkukuhkan penghayatan dan pengamalan Negara Zikir Melayu Islam Beraja bagi warga perkhidmatan awam dan masyarakat negara ini. Serta menyemai nilai dan jati diri kebruneian melalui gagasan Negara Zikir dan Konsep Melayu Islam Beraja.

MAJLIS CERAMAH

Program Ihya Syabab Al-Wathan

Rabu, 11 Ramadan 1443H bersamaan 13 April 2022M, Program Ihya Syabab Al-Wathan yang diselenggarakan oleh Majlis Persatuan Pelajar, Sesi 2021M / 2022M, Kolej Universiti Perguruan Ugama Seri Begawan (KUPU SB) telah diadakan dengan penyampaian ceramah oleh Yang Mulia Ustaz Hilman bin Haji Salim, Pengarah Pusat Kajian Fiqh al-Usrah, KUPU SB yang bertajuk Bulan Ramadan, Bulan al-Quran. Majlis diadakan di Surau KUPU SB selepas solat fardu Zuhur.



Dalam ceramah berkenaan, Yang Mulia Ustaz Hilman menyentuh mengenai ganjaran membaca al-Quran yang digandakan kerana ianya merupakan ibadat teragung di bulan yang suci ini. Justeru, dengan memperbanyakkan bacaan,

hafalan dan tartil serta tadabbur menjadi sebab akan mendapat syafaat al-Quran. Tambahnya lagi, antara ibadat-ibadat yang terkait dengan al-Quran dalam bulan Ramadan adalah tilawah, khatam, menambah hafalan walau sedikit, mengkhususkan waktu untuk tadabbur, mempelajari hikmah dan 'ibrah, membaca tafsir, tadabbur dan tafakkur semasa membacanya, dan yang terakhir sekali adalah sedaya upaya menghadirkan hati semasa membacanya.

Program Ihya Syabab al-Wathan ini berlangsung selama lima hari pada tarikh dan di masjid-masjid terpilih di Daerah Brunei Muara. Program diisikan dengan aktiviti berbuka puasa bersama-sama dan Qiamullail pada malam-malam terakhir bulan Ramadan. Ceramah khas juga disampaikan oleh penceramah-penceramah undangan yang terdiri daripada staf akademik KUPU SB.

Program seumpamanya merupakan satu usaha bagi melibatkan warga KUPU SB dan belia-belia untuk meningkatkan ketakwaan dan keimanan di bulan Ramadan dengan amalan-amalan seperti solat berjemaah, membaca al-Quran, memperbanyakkan zikir dan sedekah. Juga menggalakkan belia-belia untuk mendekatkan diri

dengan masjid dan menanai rasa kecintaan mereka terhadap masjid selain mengeratkan hubungan silaturahim sesama belia dan jemaah masjid.

Program Ihya Syabab Al-Wathan diteruskan pada hari Sabtu, 14 Ramadan 1443H bersamaan 16 April 2022M, di Masjid Al-Ameerah Al-Hajjah Maryam, Kampung Jerudong yang diisikan dengan penyampaian ceramah oleh Yang Mulia Dr Haji Ahmad Asri Lubis selepas solat fardu Zuhur.



Dalam ceramah yang bertajuk Apakah Ramadanku diterima? Yang Mulia Ustaz Dr Haji Ahmad Asri menyentuh mengenai tanda-tanda amalan seseorang itu diterima oleh Allah iaitu antaranya apabila ia diberi taufik untuk melakukan ketaatan selepas melakukan

satu ketaatan sebelumnya. Menurutny, seseorang itu perlu mengistiqamahkan diri dan mengikhhlaskan diri dalam beribadah kepada Allah Subhanahu Wata'ala.

Program seterusnya diadakan di Masjid Ash-Shaliheen pada 18 Ramadan 1443H bersamaan 20 April 2022M.

Majlis Penutup Program Ihya Syabab Al-Wathan telah diadakan pada malam Jumaat, 27 Ramadan 1443H bersamaan 29 April 2022M di Masjid Hassanal Bolkiah, Kampung Mentiri yang diisikan dengan acara Qiamullail.

Hadir selaku tetamu kehormat majlis ialah Yang Mulia Dr Haji Adanan bin Haji Basar, Ra'es KUPU SB, pegawai-pegawai dan pensyarah-pensyarah lelaki serta mahasiswa KUPU SB.

Majlis dimulakan dengan Solat Tahajjud, Solat Taubat dan Solat Tasbih yang diketuai oleh Yang Mulia Ustaz Abdul Rahman bin Haji Ajak, Pensyarah Kunjungan Pusat Penyelidikan dan Pengajian Jawi dan Kitab Turath, KUPU SB.

Majlis diteruskan dengan penyampaian Tausiyah oleh tetamu kehormat majlis dan aktiviti bersahur bersama para jemputan majlis.

MAJLIS PENYAMPAIAN BARAKAH RAMADAN 1443H / 2022M

Sabtu, 14 Ramadan 1443H bersamaan 16 April 2022M, Kolej Universiti Perguruan Ugama Seri Begawan (KUPU SB) melalui Bahagian Hal Ehwal Pelajar telah mengadakan Majlis Penyampaian Barakah Ramadan bagi tahun 1443H / 2022M. Majlis merupakan acara tahunan sempena bulan Ramadan di bawah program Ihya Ramadan. Tahun ini penyampaian dilakukan secara pandu lalu di hadapan Bangunan Pentadbiran KUPU SB.

Hadir selaku tetamu kehormat majlis ialah Yang Mulia Datin Dr Hajah Noor Hira binti Haji Noor Kaseh, Pemangku Penolong Ra'es, pegawai-pegawai utama, pensyarah-pensyarah dan warga KUPU SB.

Acara dimulakan dengan bacaan surah al-Fatihah, Asmaul Husna dan Nyanyian Lagu Kebangsaan Negara Brunei Darussalam. Manakala Doa Penutup dibacakan oleh Yang Mulia Awang Abdul Hadi bin Haji Abdullah, Pemangku Penolong Pegawai Kesejahteraan.

Ucapan alu-aluan disampaikan oleh Yang Mulia Awang Ali Hardi bin Haji Mohamed, Dekan Pelajar.

Seramai sembilan puluh satu (91) orang penerima sumbangan pada tahun ini. Tujuh puluh lapan (78) adalah pelajar KUPU SB yang kurang berkemampuan dan selebihnya adalah anak yatim yang juga daripada kalangan warga KUPU SB yang telah terpilih dan dijemput untuk menerima sumbangan barakah yang berupa infaq ikhlas. Sumbangan disampaikan oleh tetamu kehormat majlis.

Objektif majlis seumpamanya diadakan adalah untuk menghayati dan mencintai bulan suci Ramadan yang penuh dengan nikmat kerahmatan dan keampunan selain mengukuhkan ketakwaan di kalangan warga KUPU SB dalam bulan yang penuh dengan kerahmatan. Majlis ini juga bertujuan untuk mengambil iktibar perkara yang berkebajikan daripada perilaku yang diamalkan oleh Rasulullah Sallallahu 'alaihi wasallam dalam bulan mulia ini supaya dapat diaplikasikan dalam bulan-bulan seterusnya. Dengan menyemarakkan aktiviti-aktiviti keagamaan di sepanjang bulan Ramadan ianya diharap dapat mengeratkan ikatan silaturahim dalam kalangan warga KUPU SB.



Tetamu kehormat, Yang Mulia Datin Dr Hajah Noor Hira binti Haji Noor Kaseh, Pemangku Penolong Ra'es (Gambar atas) serta pegawai utama dan pensyarah ketika menyempurnakan penyampaian sumbangan kepada para penerima.



MAJLIS MAHABBAH RAMADAN 1443H / 2022M

Khamis, 19 Ramadan 1443H bersamaan 21 April 2022M. Majlis Mahabbah Ramadan 1443H/2022M yang diselenggarakan oleh Majlis Persatuan Pelajar, Sesi 2021/2022M, Kolej Universiti Perguruan Ugama Seri Begawan (KUPU SB) dengan kerjasama Pusat Dakwah Tutong dan Jabatan Daerah Tutong telah berlangsung di Masjid Hassanal Bolkiah, Pekan Tutong selepas waktu Asar. Majlis diisikan dengan Majlis Tahlil, Majlis Pengagihan Bantuan dan Sungkai bersama keluarga Mualaf yang terpilih.

Mahabbah Ramadan ini akan dijadikan sebagai salah satu aktiviti dalam rancangan tahunan Persatuan Pelajar, Majlis Perwakilan Pelajar dengan tujuan menerapkan kesedaran dalam kalangan mahasiswa/mahasiswi agar menjalankan tanggungjawab sosial contohnya terhadap golongan mualaf dan yang kurang berkemampuan di Negara Brunei Darussalam.

Hadir selaku tetamu kehormat majlis ialah Yang Mulia Dr Haji Adanan bin Haji Basar, Ra'es KUPU SB yang turut menyampaikan tausiyah.

Majlis diteruskan dengan bacaan Tahlil yang diketuai oleh Yang Mulia Awang Aqil Arfan bin Arjune, Penolong Exco Keugamaan dan Takmir Surau, MPP KUPU SB.

Manakala Doa Tahlil dibacakan oleh Yang Mulia Awang Muhammad Noor Syahmi bin Mazne, Ketua Exco Keugamaan dan Takmir Surau, MPP KUPU SB.

Penyampaian Barakah disampaikan oleh tetamu kehormat majlis kepada dua belas (12) keluarga Mualaf di Daerah Tutong yang terpilih. Barakah yang disampaikan merupakan barang keperluan yang berbentuk makanan asasi seperti beras, gula, minyak dan telur.

Majlis diakhiri dengan bacaan Doa Selamat yang dibacakan oleh Yang Mulia Awang Muhammad Fadli bin Bujang, Naib Yang Di-Pertua Persatuan Pelajar, MPP KUPU SB dan sesi bergambar ramai.

Program seumpamanya merupakan salah satu usaha dan wasilah mahasiswa / mahasiswi KUPU SB bagi meraih ganjaran pahala dan keagungan bulan Ramadan dengan melakukan kebajikan yang berbentuk khidmat masyarakat. Selain mempergiatkan penglibatan dan sumbangan mahasiswa/mahasiswi KUPU SB kepada masyarakat demi keharmonian negara di samping membudayakan akan kepentingan dan keprihatinan Komuniti Penyayang (*Caring Society*).



Tetamu kehormat majlis, Yang Mulia Dr Haji Adanan bin Haji Basar, Ra'es KUPU SB menyampaikan sumbangan bantuan kepada salah seorang penerima.

PROGRAM PAMERAN PEMBELAJARAN KESENIAN KHAT JAWI DAN PROGRAM TARHIB RAMADAN



Sabtu, 21 Ramadan 1443H bersamaan 23 April 2022M, Program Pameran Pembelajaran Kesenian Khat Jawi dan Program Tarhib Ramadan yang diselenggarakan oleh Mahasiswa / Mahasiswi Diploma Pengajian Jawi dan Kaligrafi dan Minor Kesenian Dalam Islam,

Kolej Universiti Perguruan Ugama Seri Begawan (KUPU SB) dengan kerjasama Kumpulan Meraih Berkah telah berlangsung di Dewan Tarbiah, KUPU SB. Majlis diisikan dengan Pameran dan Majlis Pengagihan Sumbangan kepada golongan yang terpilih.

Hadir selaku tetamu kehormat majlis ialah Yang Mulia Dr Haji Adanan bin Haji Basar, Ra'es KUPU SB. Juga hadir ialah pegawai-pegawai utama dan para pensyarah serta para penerima.

Majlis dimulakan dengan bacaan surah al-Fatihah, Lagu Kebangsaan Negara Brunei Darussalam dan bacaan Asmaul Husna secara beramai-ramai.

Majlis diteruskan dengan ucapan dari wakil program pameran iaitu Yang Mulia Awang Syahminan bin Haji Mohammad Norsham dan perasmian pembukaan pameran oleh tetamu kehormat majlis.

Penyampaian Sumbangan Program Tarhib bagi penerima lelaki disempurnakan oleh tetamu kehormat majlis. Manakala bagi penerima perempuan disempurnakan oleh Yang Mulia Datin Dr Hajah Noor Hira binti Haji Noor Kaseh. Seramai dua puluh orang asnaf yang terdiri daripada keluarga yang tinggal di Kampong Ayer menerima sumbangan berupa barang keperluan yang berbentuk makanan asasi seperti beras, gula, minyak dan telur.

Program pameran ini merupakan salah satu hasil daripada projek akhir pelajar Program Diploma Kesenian Islam di luar kampus. Inisiatif ini juga

bertujuan untuk memartabatkan tulisan jawi dan seni kaligrafi Islam sebagai tulisan al-Quran, tulisan agama dan juga tulisan nasional. Malahan memupuk minat dan kesedaran orang ramai akan kepentingan tulisan jawi itu sendiri untuk digunapakai dalam kehidupan seharian. Ia juga dapat memperkenalkan dan menyebarkan ilmu pengetahuan kepada orang ramai mengenai jawi dan jenis-jenis khat yang utama digunapakai dalam kesenian dan penulisan.

Program adalah dibukakan kepada orang ramai yang berminat untuk mengikuti Program Diploma Pengajian Jawi dan Kaligrafi Islam. Ia juga adalah kursus minor bagi pelajar yang membuat pengajian di KUPU SB.

Majlis diakhiri dengan sesi bergambar ramai dan lawatan ke Pameran Kesenian Khat Jawi.



MAJLIS PENUTUP TADARUS Ihya Ramadan Bagi Tahun 1443H / 2022M

Khamis, 26 Ramadan 1443H bersamaan 28 April 2022M, Majlis Penutup Tadarus Ihya Ramadan Bagi Tahun 1443H / 2022M yang diselenggarakan oleh Bahagian Hal Ehwal Pelajar, Kolej Universiti Perguruan Ugama Seri Begawan (KUPU SB) telah diadakan di Dewan Tarbiah, KUPU SB selepas waktu Asar.

Hadir selaku tetamu kehormat majlis ialah Yang Mulia Dr Haji Adanan bin Haji Basar, Ra'es KUPU SB. Majlis juga dihadiri oleh pegawai-pegawai utama, pensyarah-pensyarah dan kakitangan KUPU SB.

Majlis Penutup Tadarus dimulakan dengan bacaan Asmaul Husna, Nyanyian Lagu Kebangsaan Negara Brunei Darussalam beramai-ramai. Seterusnya bacaan surah al-Fatihah yang diketuai oleh Yang Mulia tetamu kehormat majlis.

Doa sebelum membaca al-Quran dan bacaan dari surah Ad-Dhuha hingga surah An-Nas dipimpin oleh Yang Mulia Ustaz Haji Nasrul Fakhri bin Haji Yahya, Pegawai Pelajaran, Pusat Ilmu Teras. Kemudian bacaan Doa Khas Khatam Al-Quran dibacakan oleh Yang Mulia Ustaz Ampuan Muhammad Fuad bin Ampuan Babba, Pegawai Kegiatan Luar, Bahagian Hal Ehwal Pelajar.

Majlis diteruskan dengan bacaan Tahlil yang diketuai oleh Yang Mulia Ustaz Abdul Hadi bin Haji Abdullah, Pemangku Pegawai Kesejahteraan, Bahagian Hal Ehwal Pelajar. Bacaan Doa Tahlil pula dibacakan oleh Yang Mulia Ustaz Ali Hardi bin Haji Mohamed, Dekan Pelajar. Manakala bacaan



Selawat Tafrijiyyah diketuai oleh Yang Mulia Awang Aqil Arfan bin Arjune, Penolong Ketua Keugamaan dan Takmir Surau, MPP KUPU SB.

Majlis diserikan lagi dengan Iftar jama'ie, Solat Fardu Maghrib dan Isyak serta Solat Sunat Tarawih berjemaah di Surau Siswa KUPU SB.

Majlis seumpamanya merupakan aktiviti tahunan yang diadakan pada setiap penghujung bulan suci Ramadan dengan bertujuan untuk meningkatkan ketakwaan dan keimanan dalam mencari malam Lailatul Qadr di samping mengeratkan lagi hubungan silaturahim di antara pegawai-pegawai, pensyarah-pensyarah dan kakitangan KUPU SB.

KUPU SB juga turut menyemarakkan lagi kemuliaan bulan suci Ramadan 1443H / 2022M dengan mengadakan Program Qiamulail pada subuh 29 April 2022M di Surau siswa, KUPU SB dan Masjid Hassanal Bolkiah, Kampung Mentiri.



PERJUMPAAN DI ANTARA KEMENTERIAN KEBUDAYAAN, BELIA DAN SUKAN DAN KOLEJ UNIVERSITI PERGURUAN UGAMA SERI BEGAWAN (KUPU SB)



Selasa, 9 Syawal 1443H bersamaan 10 Mei 2022M, Kolej Universiti Perguruan Ugama Seri Begawan (KUPU SB) telah menerima kunjungan muhibah daripada Yang Berhormat Mejar Jeneral (B) Dato Paduka Seri Haji Aminuddin Ihsan bin Pehin Orang Kaya Saiful Mulok Dato Seri Paduka Haji Abidin, Menteri Kebudayaan, Belia dan Sukan (KKBS).

Turut hadir Yang Mulia Pengiran Mohammad Amirrizal bin Pengiran Haji Mahmud, Setiausaha Tetap (Pentadbiran, Kewangan dan Estet), Yang Mulia Dr Siti Norkhalbi binti Haji Wahsalfelah, Timbalan Setiausaha Tetap (Kebudayaan), Yang Mulia Awang Haji Mohd Abdoh bin Haji Awang Damit, Pemangku Pengarah Bahagian Kesenian dan Kebudayaan, Yang Mulia Awang Suip bin Haji Abdul Wahab, Pemangku Pengarah Dewan Bahasa dan Pustaka, Yang Mulia Dayang Hajah Noridah binti Haji Abdul Hamid, Pemangku Pengarah Bahagian Perkhidmatan Sosial, Yang Mulia Awang Mohd Sabri bin Haji Anuar, Ketua Pegawai Eksekutif, Unit Strategi dan Dasar, dan Yang Mulia Awang Muhammad Faiq bin Haji Rani, Pegawai Pentadbir Tingkat Khas.

Hadir bagi pihak KUPU SB ialah Yang Mulia Dr Haji Adanan bin Haji Basar, Ra'es KUPU SB, Yang Mulia Dr Haji Abang Hadzmin bin Haji Abang Taha, Pemangku Timbalan Ra'es, Yang Mulia Datin Dr Hajah Noor Hira binti Haji Noor Kaseh, Pemangku



Penolong Ra'es, Yang Mulia Awang Adi Rani Soffian bin Abdul Rahman, Pemangku Pendaftar serta pegawai-pegawai utama KUPU SB.

Perjumpaan adalah merupakan salah satu usaha Pendekatan Senegara (*Whole of Nation Approach*) di antara KKBS dan KUPU SB. Perbincangan tertumpu kepada memulakan dan meningkatkan kerjasama antara dua pihak dalam mengukuhkan penerapan Falsafah MIB dan pemartabatan Bahasa Melayu untuk golongan belia (berdasarkan Strategi Teras 2, Dasar Belia Kebangsaan) mahupun golongan sasaran (*Vulnerable Groups*) dalam mana-mana penerapan atau pengukuhan Falsafah MIB secara efektif dalam kehidupan mereka agar boleh dijadikan salah satu strategi utama untuk meningkatkan kualiti hidup dan bagi yang berkenaan, mengeluarkan mereka serta keluarga daripada kitaran kemiskinan.

MAJLIS MENANDATANGANI MEMORANDUM PERJANJIAN (MoA)

Antara Pusat Pengkajian Kefahaman Ahli Sunnah Waljama'ah,
Kolej Universiti Perguruan Ugama Seri Begawan (KUPU SB) dan
Fakulti Usuluddin, Universiti Islam Sultan Sharif Ali (UNISSA)

Rabu, 17 Syawal 1443H bersamaan 18 Mei 2022M, Pusat Pengkajian Kefahaman Ahli Sunnah Waljama'ah, Kolej Universiti Perguruan Ugama Seri Begawan (KUPU SB) telah menandatangani Memorandum Perjanjian (MoA) bersama Fakulti Usuluddin, Universiti Islam Sultan Sharif Ali (UNISSA) yang meliputi kerjasama dalam bidang penganjuran bersama persidangan dan bengkel, pengajaran dan pembelajaran, kursus-kursus latihan, pertukaran penerbitan, program kerjasama penyelidikan jurnal Ahli Sunnah Waljama'ah, jerayawara pengukuhan kefahaman akidah Ahli Sunnah Waljama'ah, pembantu teknikal atau latihan serta kerjasama dalam mana-mana bidang yang mempunyai kepentingan kepada dua belah pihak.

Penandatanganan Memorandum Perjanjian diadakan secara bersemuka di Bilik Taqwa, KUPU SB. Majlis dimulakan dengan bacaan surah al-Fatihah kemudian diteruskan dengan ucapan alu-aluan daripada Pengarah Pusat Pengkajian Kefahaman Ahli Sunnah Waljama'ah, KUPU SB, Yang Mulia Ustaz Haji Mohd Azmi bin Haji Omar dan Dekan Fakulti Usuluddin, UNISSA, Yang Mulia Dr Hajah Lily Suzana binti Haji Samsu.



Menandatangani perjanjian bagi pihak KUPU SB adalah Pemangku Penolong Ra'ees KUPU SB, Yang Mulia Datin Dr Hajah Noor Hira binti Haji Noor Kaseh. Manakala menandatangani bagi pihak UNISSA ialah Pemangku Penolong Rektor (Hal Ehwal Akademik), UNISSA, Yang Mulia Pengiran Dr Hajah Norkhairiah binti Pengiran Haji Hashim.

Dengan termeterainya perjanjian di antara kedua pihak diharap akan dapat sama-sama berganding bahu dalam mencapai matlamat untuk menjelmakan satu masyarakat bangsa yang benar-benar berilmu, beramal dan bertakwa menurut ajaran Ahli Sunnah Waljama'ah dan memperkukuhkan aliran Ahli Sunnah Waljama'ah di Negara Brunei Darussalam.



Selasa, 23 Syawal 1443H bersamaan 24 Mei 2022M, Kolej Universiti Perguruan Ugama Seri Begawan melalui Fakulti Usuluddin dengan kerjasama Jabatan Peperiksaan, Kementerian Pendidikan telah mengadakan Multaqa Usuluddin yang bertemakan “Kurikulum Usuluddin: Pemantapan dan Keberkesanan”.

Hadir selaku tetamu kehormat majlis ialah Yang Mulia Awang Haji Mohammad Rosli bin Haji Ibrahim, Setiausaha Tetap, Kementerian Hal Ehwal Ugama yang seterusnya merasmikan seminar Multaqa Usuluddin. Dalam ucapan perasmian, beliau menyatakan kekhawatiran tradisi ilmu Usuluddin tidak dapat dikembangkan dalam masyarakat khususnya generasi muda jika sekiranya penambahbaikan tidak diusahakan oleh ahli atau pakar dalam bidang ilmu itu sendiri. Tekannya golongan ilmuwan perlu memainkan peranan dengan menampilkan disiplin Usuluddin mengikut peringkat tertentu, iaitu membezakannya dengan ilmu bersesuaian dengan orang awam dan ahli dalam bidang ini. Tambahnya, perlunya ada inisiatif baharu seperti menggabungkannya dengan disiplin ilmu moden yang mempunyai kaitan dengannya, termasuk sains sosial, kaunseling dan psikologi.

Majlis dimulakan dengan bacaan surah al-Fatihah, bacaan Asmaul Husna dan Nyanyian Lagu Kebangsaan Negara Brunei Darussalam.

Seterusnya ucapan alu-aluan disampaikan oleh wakil Pengerusi seminar, Yang Mulia Dr Norasimah binti Haji Omar, Timbalan Dekan Fakulti Usuluddin, KUPU SB. Di dalam ucapannya, beliau menyatakan bahawa seminar merupakan acara tahunan Fakulti Usuluddin yang bertujuan adalah untuk memantapkan dan mendalami ilmu pengetahuan dan pengajian Usuluddin dalam kalangan pensyarah dan pelajar, di samping dapat menyelaraskan serta menambahbaik kurikulum Usuluddin di peringkat prauniversiti di bawah Kementerian Hal Ehwal Ugama dan Kementerian Pendidikan bagi memenuhi keperluan asas para pelajar.



Tetamu kehormat majlis, Setiausaha Tetap, Kementerian Hal Ehwal Ugama, Yang Mulia Awang Haji Mohammad Rosli bin Haji Ibrahim

Tambah beliau lagi, tema seminar adalah bagi menyahut cabaran isu serantau terhadap masalah yang telah timbul dalam bidang pengajian Usuluddin di pelbagai peringkat. Cabaran menyebabkan kemerosotan jumlah pelajar kerana sambutan program yang ditawarkan kurang mendapat sambutan. Maka perlunya pemantauan, penelitian serta penilaian semua terhadap sukatan pelajaran Usuluddin dan Syariah selain membuat penambahbaikan sama ada dari aspek penyediaan kursus-kursus yang relevan dengan isu, kehendak semasa. Selain itu para ilmuwan Usuluddin juga perlu didedahkan dengan kaedah pengajaran yang lebih praktikal bagi memudahkan penguasaan dalam pengajaran serta pembelajaran secara lebih berkesan yang melibatkan penggabungan disiplin ilmu moden yang bertujuan menarik minat pelajar.

Seminar dimulakan dengan pembentangan Ucaptama yang disampaikan oleh Yang Mulia Dr Haji Adanan bin Haji Basar, Ra'ees KUPU SB.

Dalam ucaptamanya, Yang Mulia Dr Haji Adanan membangkitkan beberapa isu dalam kurikulum Usuluddin yang perlu penilaian semula iaitu dari segi matlamat pelajaran Usuluddin yang perlu diperjelas agar dapat membina personaliti pelajar yang berjati MIB. Penggubalan semula sukatan pelajaran perlunya sesuai dengan pertumbuhan dan perkembangan pelajar remaja secara holistik. Antaranya aktiviti pengajaran dan pembelajaran yang divariasikan dengan penggunaan multimedia, media sosial dan merujuk kepada potensi pelajar. Juga memperkemas pendekatan



pentaksiran iaitu dari segi pemarkahan, penilaian berterusan berasaskan projek dan penilaian berasaskan keterlibatan pelajar.

Tambah Yang Mulia Dr Haji Adanan, dengan merujuk kepada sistem pengajian Islam yang menunjukkan kedudukan pelajaran Usuluddin dalam

peringkat pendidikan tertentu menunjukkan perlunya penilaian dibuat agar ugama menjadi pelajaran teras bagi pendidikan pelajar di semua peringkat umur.

Kurikulum Usuluddin menurutnya perlulah selaras dengan matlamat pendidikan yang secara umumnya adalah bagi mencapai matlamat individu pendidikan Islam dari segi rohani, akhlak, akal, jasmani, masyarakat, kerjaya juga dakwah dan jihad. Hal ini adalah kerana dalam abad ke-21, banyak keperluan bagi mendepani globalisasi dengan pendekatan pengajaran dan pembelajaran yang sesuai menggunakan pengajaran sepanjang hayat yang mencakupi kemahiran teknologi maklumat dan komunikasi, kemahiran belajar dan inovasi serta kemahiran hidup dan kerjaya.

Majlis juga diteruskan dengan penyampaian sijil kepada para pembentang seminar Multaqa Usuluddin.

Seminar berlangsung selama dua hari diisikan dengan dua kategori penyampaian kertas kerja. Pertama, pembentangan kertas kerja termasuk pembentangan Ucaptama dan lima (5) kertas kerja oleh tenaga akademik KUPU SB iaitu Yang Mulia Profesor Dr Ali Sayed Abdel Hameed Youseff El-Syimi, Yang Mulia Dr Mikdar Rusdi, Yang Mulia Dr Norasibah binti Haji Besar, Yang Mulia Dr Norasimah binti Haji Omar dan Yang Mulia Dr Haji Matussien bin Haji Jumat. Kedua, pembentangan seminar berbentuk forum yang ahli panelnya terdiri daripada Yang Mulia Profesor Madya Dr Mohd Zahiri bin Awang Mat, Profesor Madya, Fakulti Pendidikan, KUPU SB, Yang Mulia Pengiran Abdul Razak bin Pengiran Haji Metahir, Penguasa Pelajaran Ugama, Jabatan Pengajian Islam selaku wakil Kementerian Hal Ehwal Ugama dan Yang Mulia Awang Haji Rozaidi bin Haji Mohammad Daud, Pegawai Pelajaran Kanan, Jabatan Peperiksaan, selaku wakil Kementerian Pendidikan.

Para peserta seminar adalah disasarkan kepada tenaga pengajar dari Jabatan Pengajian Islam, guru di Pusat Tingkatan Enam seluruh negara, pegawai-pegawai dari Institusi Pendidikan Tinggi di Negara Brunei Darussalam dan Jabatan Peperiksaan, Jabatan Perkembangan Kurikulum,





Kementerian Pendidikan serta Bahagian Kurikulum dan Bahagian Peperiksaan, Jabatan Pengajian Islam, JAMA'AT dan Angkatan Bersenjata Diraja Brunei (ABDB).

Seminar Multaqa Usuluddin diteruskan pada hari kedua Rabu, 24 Syawal 1443H bersamaan 25 Mei 2022M yang juga merupakan Majlis Penutup.

Majlis diisikan dengan sesi forum yang disampaikan oleh ahli panel Yang Mulia Profesor Madya Dr Mohd Zahiri bin Awang Mat, Profesor Madya, Fakulti Pendidikan KUPU SB, Yang Mulia Pengiran Abdul Razak bin Pengiran Haji Metahir, Penguasa Pelajaran Ugama, Jabatan Pengajian Islam selaku wakil Kementerian Hal Ehwal Ugama, dan Yang Mulia Awang Haji Rozaidi bin Haji Mohammad Daud, Pegawai Pelajaran Kanan, Jabatan Peperiksaan, selaku wakil Kementerian Pendidikan. Forum dimoderatkan oleh Yang Mulia Dr Haji Mohammad Shahrol Azmi bin Haji Abdul Muluk, Penolong Pensyarah KUPU SB.

Forum membincangkan mengenai kurikulum Usuluddin yang perlu dilihat kesesuaiannya dengan perkembangan semasa dan pengaplikasiannya oleh para pelajar bukan sahaja dalam kelas tetapi dalam kehidupan seharian. Ia juga perlu diselaraskan dengan Negara Zikir Melayu Islam Beraja.

Hal ini membawa kepada kesimpulan perlunya pihak-pihak seperti Kementerian Pendidikan, Kementerian Hal Ehwal Ugama dan Institusi-Institusi Pendidikan dan pihak berkepentingan

lainnya untuk bergabung menggubal kurikulum Usuluddin ini agar relevan untuk masa kini selain menyediakan buku-buku teks khusus sebagai bahan rujukan.

Sesi kedua majlis dimulakan dengan bacaan surah al-Fatihah, bacaan Asmaul Husna dan Nyanyian Lagu Kebangsaan Negara Brunei Darussalam.

Hadir selaku tetamu kehormat majlis ialah Yang Mulia Dr Haji Adanan bin Haji Basar, Ra'es KUPU SB.

Ucapan alu-aluan disampaikan oleh wakil Pengerusi seminar Multaqa Usuluddin, Yang Mulia Dr Norasimah binti Haji Omar yang menyatakan bahawa Fakulti Usuluddin, KUPU SB mengambil berat akan isu-isu pendidikan semasa, khususnya yang berkaitan dengan pendidikan Islam dalam bidang Usuluddin dan komited untuk membantu dalam merungkai isu-isu atau permasalahan tersebut. Beliau juga berharap dengan berlangsungnya seminar ini akan adanya perkongsian maklumat dan idea serta kolaborasi yang berterusan di antara semua pihak yang berkepentingan bagi sama-sama memastikan keberkesanan kurikulum pendidikan Islam khususnya bidang Usuluddin agar tetap relevan dari masa ke semasa. Selain menambah kesedaran semua pihak akan peri pentingnya ilmu-ilmu Usuluddin dalam membentuk syaksiah dan memantapkan jati diri muslim sejati secara holistik.

Majlis juga diteruskan dengan pembentangan resolusi oleh Yang Mulia Dr Haji Matussien

bin Haji Jumat, Penolong Profesor Kanan, Fakulti Usuluddin. Beliau merumuskan ada beberapa perkara penting yang perlu diambil perhatian iaitu kurikulum Usuluddin yang harus diintegrasikan dengan ilmu-ilmu seperti Turath Usuluddin dan ilmu-ilmu mu'asir juga perlunya ada kesinambungan pengajian Usuluddin di Institusi Pengajian Tinggi (IPT) sebagai kelangsungan pembelajaran peringkat rendah dan menengah. Selain memastikan pengajian Usuluddin adalah berasaskan aliran Ahli Sunnah Waljama'ah. Kedua, Pedagogi Usuluddin yang perlu diperkasakan dengan pendekatan pengajaran dan pembelajaran yang mampu melahirkan model insan juga meningkatkan penguasaan pensyarah dan tenaga pengajar bidang Usuluddin berasaskan teknologi maklumat terkini yang praktikal dan berkesan yang menggunakan pendekatan pengajaran terbaik (*best practice*). Ketiga, pentaksiran Usuluddin yang perlu dinilai semula di semua peringkat pengajian untuk meningkatkan kesahan dan kebolehpercayaan ujian yang dilaksanakan selain mengintegrasikan sistem pentaksiran

secara holistik. Keempat, bahan pengajaran dari segi buku teks yang disediakan perlulah selaras digunakan oleh semua tingkatan enam berasaskan rujukan kitab-kitab ulama Ahli Sunnah Waljama'ah. Juga bahan rujukan utama perlu diperbanyakkan terutama dalam Bahasa Melayu di Perpustakaan Pusat Tingkatan Enam Negara Brunei Darussalam.

Diharap dengan berlangsungnya seminar Multaqa Usuluddin ini dapat memantapkan dan mendalami ilmu pengetahuan dan pengajian Usuluddin para pensyarah dan pelajar. Tujuan lain adalah untuk menyelaraskan kurikulum Usuluddin di peringkat prauniversiti di bawah Kementerian Hal Ehwal Ugama dan Kementerian Pendidikan untuk memenuhi keperluan asas para remaja. Ianya juga diharap dapat mengukuhkan hubungan dan persefahaman ilmuwan Usuluddin Kementerian Hal Ehwal Ugama dan Kementerian Pendidikan dalam sebuah wadah ilmiah yang tersusun dan terancang di samping memupuk semangat bekerjasama dan mengeratkan silaturahim dalam kalangan peserta multaqa.



SEMINAR PENDIDIKAN VAKSIN KETUHANAN DAN S.O.P UGAMA

Bersempena Persidangan dan Pameran Pertengahan Tahun Brunei 2022M (BRUNEI MYCE 2022M)

'Pengamalan Vaksin Ketuhanan dan S.O.P Ugama Manifestasi Negara Zikir'



Sabtu, 4 Zulkaedah 1443H bersama 4 Jun 2022M, Kolej Universiti Perguruan Ugama Seri Begawan telah mengadakan Seminar Pendidikan Vaksin Ketuhanan dan S.O.P Ugama bersempena dengan acara Persidangan dan Pameran Pertengahan Tahun Brunei 2022M (Brunei MYCE 2022M) dengan tema, Pengamalan Vaksin

Ketuhanan dan S.O.P Ugama Manifestasi Negara Zikir.

Hadir selaku tetamu-tetamu kehormat bersama adalah Yang Berhormat Pehin Orang Kaya Seri Kerna Dato Seri Setia (Dr) Haji Awang Abu Bakar bin Haji Apong, Menteri Hal Ehwal Dalam Negeri; Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman,

Menteri Hal Ehwal Ugama; Yang Berhormat Dato Seri Setia Awang Haji Ali bin Haji Apong, Menteri Sumber-Sumber Utama dan Pelancongan; Yang Berhormat Dato Seri Setia Haji Awang Abdul Mokti bin Haji Awang Daud, Menteri di Jabatan Perdana Menteri; dan Yang Berhormat Dato Seri Setia Dr Awang Haji Mohd Isham bin Jaafar, Menteri Kesihatan, Negara Brunei Darussalam.

Majlis dimulakan dengan bacaan surah al-Fatihah, bacaan Asmaul Husna, Selawat Tafrijiyyah, seterusnya Nyanyian Lagu Kebangsaan Negara Brunei Darussalam.

Ucapan alu-aluan disampaikan oleh Pengerusi Jawatankuasa Pandu, Yang Mulia Dr Haji Adanan bin Haji Basar, Ra'es KUPU SB.

Majlis diteruskan dengan pembentangan Kertas Perdana oleh Yang Mulia Dato Seri Setia Dr Haji Japar bin Haji Mat Dain @ Maidin, Timbalan Mufti Kerajaan Negara Brunei Darussalam dengan mengupas tema seminar iaitu Pengamalan Vaksin Ketuhanan dan SOP Ugama Manifestasi Negara Zikir.



Yang Berhormat Menteri Hal Ehwal Dalam Negeri, Yang Berhormat Menteri Hal Ehwal Ugama, Yang Berhormat Menteri Sumber-Sumber Utama dan Pelancongan, Yang Berhormat Menteri Kesihatan dan Yang Berhormat Menteri di Jabatan Perdana Menteri turut hadir pada Seminar Pendidikan Kefahaman Vaksin Ketuhanan dan S.O.P Ugama.



Yang Mulia Timbalan Mufti melalui pembentangannya menekankan, Negara Brunei Darussalam dasar pentadbirannya adalah Melayu Islam Beraja (MIB) dan Negara Zikir sebagai matlamatnya iaitu sebuah negara yang rakyat dan penduduknya sentiasa mengingati Allah dalam segala tindak-tanduknya dengan tujuan dan harapan agar kehidupan bermasyarakat dan bernegara adalah dalam keadaan aman, tenteram, harmoni dan selamat dari sebarang anasir jahat yang menjejaskan nikmat keamanan, ketenteraman dan keharmonian itu.

Maka jelasnya dalam memastikan kekalnya keamanan, ketenteraman, keharmonian dan keselamatan agar terus dinikmati oleh generasi akan datang, perlunya inisiatif dilaksanakan dalam mengajak masyarakat mengutamakan dan mengikut ajaran ugama Islam dalam kehidupan seharian. Ini tegasnya adalah langkah yang wajar bagi mengekalkan segala nikmat yang dikurniakan oleh Allah kepada Negara Brunei Darussalam.

Yang Mulia Timbalan Mufti turut menerangkan bahawa Vaksin Ketuhanan yang berupa amalan seperti doa, zikir, istighfar, selawat, bacaan al-Quran dan seumpamanya mempunyai kekuatannya sendiri, dalam menolak mudarat dan musibah. Tambah Yang Mulia Timbalan Mufti, SOP Ugama yang telah digariskan oleh Allah dan RasulNya apabila tidak dipatuhi akan mendatangkan mudarat dalam kehidupan.

Vaksin Ketuhanan dan SOP Ugama tekannya penting dalam mendepani cabaran kesusahan penularan wabak Covid-19. Malahan ia adalah sebagai sebahagian langkah menuju matlamat menjadikan Negara Brunei Darussalam Sebuah Negara Zikir. Perlunya rakyat sentiasa berdamping dengan ar-Rahman agar kita sentiasa dalam perhatian Allah. Malahan kriteria utama adalah sebuah negara yang mempunyai penduduk yang sentiasa mengingatkan Allah serta patuh dan taat dalam melakukan suruhanNya dan meninggalkan laranganNya agar kehidupan menjadi berkat aman, tenteram, selamat dan harmoni kerana mendapat rahmat Allah.



Ceramah khas secara dalam talian disampaikan oleh Yang Berbahagia Profesor Dr H. Abdul Somad Batubara, Lc.m M.A., Ph.D Pengasuh Pesantren Tahfizh Al-Quran Az-Zahra Riau, Indonesia dengan tajuk ceramahnya Kehebatan Pendekatan Vaksin Ketuhanan dan SOP Ugama Dalam Mendepani Wabak.

Yang Berbahagia Profesor Dr H. Abdul Somad menjelaskan wabak memang sudah lama wujudnya dan kesannya kepada orang yang terdahulu lebih dahsyat. Sejarah yang terdahulu ini sudah memberikan pengetahuan kepada manusia zaman sekarang dan ia bukanlah suatu yang baru. Malahan dengan mempelajarinya kita sepatutnya sabar dalam menghadapi wabak yang ada sekarang.

Tekannya Islam menjaga nyawa dan perlunya kita menjaga orang lain antaranya dengan mengenakan sungkup muka. Hal ini jelasnya dalam menghadapi wabak, prinsip utama adalah dengan tidak menjerumuskan diri kepada kebinasaan dan memudaratkan orang lain.

Wabak bukan sahaja azab semata-mata malahan adalah rahmat bagi orang beriman. Tegasnya sebagai hamba Allah perlunya yakin akan takdir Allah agar mendapat syahid. Allah akan reda jika kita reda akan Allah. Ini menunjukkan kita harus mengambil langkah-langkah bagi mendepani wabak. Rumusnya, perlunya seorang muslim itu berusaha menjaga kesihatan diri, jangan menuju kebinasaan dan perlunya sentiasa sabar jika terkena wabak.



Seminar pada sesi pagi diteruskan dengan dua pembentangan kertas utama. Kertas Utama I disampaikan oleh Yang Berbahagia Ustaz Dato' Haji Badli Shah bin Haji Alauddin, Imam Besar Masjid Negeri Sultan Ahmad 1, Kuantan, Pahang, Malaysia. Tajuk pembentangan beliau adalah Penerapan Vaksin Ketuhanan dan SOP Ugama Dalam Kalangan Keluarga dan Masyarakat Dalam Mendepani Wabak: Pendidikan Holistik Dengan Berpandukan al-Quran dan as-Sunnah.

Beliau mengatakan kaedah Islam dalam usaha untuk menangani penyakit berjangkit dari terus menular dan membahayakan manusia. Agama Islam sememangnya agama yang memberi panduan terbaik dalam menangani wabak berbahaya seperti COVID-19 yang dapat dilihat dalam dalil-dalil sebagai panduan pencegahan dan seterusnya ianya dapat dihentikan.

Jelasnya COVID-19 memberi kesan kepada manusia yang boleh dilihat dari sudut ekonomi, sosial dan juga psikologi. Maka dalam mendepani wabak ini, selain mematuhi protokol kesihatan yang telah ditetapkan oleh kerajaan perlunya bertawakal kepada Allah kerana wabak ini adalah sebagai ujian kepada manusia dengan cara berdoa dan berzikir, berkomunikasi dengan Allah. Ini jelasnya akan memberikan kekuatan transendental yang akan menjadi media refleksi yang dapat memberikan ketenangan batin dan jauh daripada ketakutan dan keresahan.

Beliau juga menambah, vaksin ketuhanan adalah rangkaian aktiviti serta ritual ibadah umat Islam dalam menghadapi serangan wabak COVID-19. Antaranya seperti yang dijelaskan oleh Yang Berhormat Mufti Kerajaan Negara Brunei Darussalam iaitu dengan membaca Qunut Nazilah, pembacaan surah Yaasin dan alunan ayat-ayat suci al-Quran yang pastinya apabila dilakukan akan memberikan ketenangan hati. Manakala SOP Ugama adalah pelaksanaan SOP yang dengan tujuan untuk menjaga kesihatan yang menjurus kepada menjaga nyawa seperti yang merupakan bahagian daripada Maqasid Syariah.

Hal ini tegasnya menunjukkan Vaksin Ketuhanan dan SOP Ugama ini perlulah diperluaskan kefahamannya di kalangan masyarakat dan keluarga kerana ia merupakan satu pendidikan holistik yang bertepatan dengan al-Quran dan as-Sunnah.

Manakala Kertas Utama II dibentangkan oleh Yang Berbahagia Puan Hatijah binti Hashim, Pegawai Penyelidik Persatuan Pengguna, Pulau Pinang, Malaysia. Tajuk pembentangan beliau pula adalah Cabaran Pengguna Muslim Menghadapi Wabak COVID-19 : Pengalaman Malaysia.

Yang Berbahagia Puan Hatijah menjelaskan bahawa Kerajaan Malaysia dan persatuan serta badan-badan NGO Malaysia melakukan pelbagai usaha dalam menangani wabak Covid-19. Antaranya adalah dengan melaksanakan Perintah Kawalan Pergerakan (PKP) yang sekaligus mengubah corak dan norma kehidupan rakyat Malaysia terutama sekali dari segi sosial dan ekonomi.

Tambahnya, hal ini diambil berat oleh pihak berkenaan dan inisiatif tambahan diberikan iaitu bantuan dari segi keperluan kewangan, makanan dan pakaian. Malahan Malaysia juga memperkenalkan program vaksinasi sebagai salah satu kaedah mengawal pandemik. Namun, terdapat cabaran terutama pengguna Muslim yang khuatir akan isu kehalalan produk yang digunakan dalam vaksin. Dalam hujahnya merujuk kepada Maqasid Syariah, keadaan darurat membolehkan keutamaan dalam merawat dan mencegah penyakit.

Majlis sesi pagi diakhiri dengan penyampaian cenderahati kepada para pembentang, moderator dan tetamu-tetamu kehormat bersama.

Turut hadir pada pagi itu ialah Yang Berhormat Pengiran Dato Seri Paduka Haji Bahrom bin Pengiran Haji Bahar, Timbalan Menteri Hal Ehwal Ugama; ahli-ahli Majlis Ugama Islam, Setiausaha-Setiausaha Tetap, Naib Canselor Universiti Brunei Darussalam, Wakil Naib Canselor Universiti Teknologi Brunei, Timbalan-Timbalan Setiausaha Tetap serta para jemputan dan orang ramai.

Seminar Pendidikan Kefahaman Vaksin Ketuhanan dan S.O.P Ugama bersempena dengan Brunei MYCE 2022M disambung pada sebelah petang diisikan dengan forum.

Hadir selaku tetamu kehormat ialah Yang Mulia Pengiran Dato Seri Paduka Haji Bahrom bin Pengiran Haji Bahar, Timbalan Menteri Hal Ehwal Ugama, Negara Brunei Darussalam.

Forum dimoderatkan oleh Yang Mulia Dr Noralizam bin Haji Ali Akbar, Dekan Fakulti Syariah, KUPU SB. Ahli panel terdiri daripada Yang Mulia Dr Haji Adanan bin Haji Basar, Ra'es KUPU SB dan Yang Mulia Dr. Hajah Riamiza Natalie binti Haji Momin, Konsultan Penyakit Berjangkit, Kementerian Kesihatan yang membincangkan mengenai Integrasi Vaksin Ketuhanan dan SOP Ugama dan Vaksin dan SOP Perubatan Moden dalam Mendepani COVID-19.

Wabak dalam sejarah Islam menurut Yang Mulia Dr Haji Adanan adalah berpunca oleh persekitaran dan jangkitan. Pendekatan mengikut sunnah Rasulullah dalam menangani COVID-19 antaranya mengamalkan pemakanan yang sihat, beriadah, penampilan yang bersih. Dr. Hajah Riamiza Natalie menjelaskan dari sudut saintifik aktiviti manusia yang menyumbang kepada perkembangan wabak ini. Mengikut peredaran masa, wabak ini semakin maju sejajar dengan kemajuan dan aktiviti manusia juga. Beliau juga menjelaskan perbezaan epidemik, pandemik dan endemik seperti Coronavirus yang dihadapi sekarang.

Dari sudut Islam, salah satu pendekatan Rasulullah dan para sahabat dalam mendepani wabak antaranya dengan mandi air hujan juga menggunakan habbatussauda. Jelas Yang Mulia Dr. Hajah Riamiza Natalie, melihat dari SOP yang diikuti dan efektif adalah merupakan langkah-langkah kesihatan awam yang sudah lama dibuat sejak dulu lagi. Ini dapat dilihat dengan penggunaan vaksin yang matlamatnya adalah untuk membendung perkembangan wabak dan mengelak jangkitan teruk malahan kematian.

Resolusi pembentangan disampaikan oleh Yang Mulia Dr Adibah Husna binti Haji Ismail, Penolong Pensyarah KUPU SB yang kemudian menyerahkan kepada Pengerusi Jawatankuasa Pandu Seminar Pendidikan Vaksin Ketuhanan dan SOP Ugama.



Majlis diakhiri dengan penyerahan Resolusi dan penyampaian cenderahati kepada Ahli Panel dan Moderator Forum serta tetamu kehormat majlis. Bacaan Doa Penutup dibacakan oleh Yang Mulia Awang Muhammad Yadiy bin Haji Mat Yassin, KUPU SB.

Seminar seumpama ini diharap dapat memberikan kefahaman mengenai kepentingan Vaksin Ketuhanan dan S.O.P Ugama serta hubungkaitnya dengan penjagaan kesihatan moden. Memahami vaksin dan kepentingannya dalam menangani wabak dari perspektif perubatan moden dan Syariah. Menekankan keutamaan pengamalan cara hidup Sunnah dan melalui seminar ini juga diharapkan dapat mengenal pasti kepentingan vaksin ketuhanan dan S.O.P ugama dalam menangani wabak COVID-19 di samping menerapkannya dalam kalangan keluarga dan masyarakat.

Acara Persidangan dan Pameran Pertengahan Tahun Brunei 2022M (Brunei MYCE 2022M) adalah dianjurkan oleh Kementerian Sumber-Sumber Utama dan Pelancongan melalui Lembaga Pelancongan Brunei dengan kerjasama agensi-agensi kerajaan, badan-badan berkanun, pihak berkepentingan dan agensi-agensi swasta. Acara Brunei MYCE 2022M ini juga disokong penuh oleh Kementerian Hal Ehwal Luar Negeri, Kementerian Hal Ehwal Dalam Negeri, Kementerian Kesihatan, Kementerian Pendidikan dan Kementerian Kebudayaan, Belia dan Sukan. Selain itu, antara rakan-rakan kongsi lain yang juga mendukung acara Brunei MYCE 2022M ini adalah D'Sunlit Sdn Bhd selaku pengendali acara; Datastream Digital Sdn Bhd (DST) sebagai rakan Telco; serta beberapa rakan media rasmi iaitu Radio Televisyen Brunei (RTB), Jabatan Penerangan (Pelita Brunei) dan Brunei Press Sdn Bhd.

Sabtu, 4 Zulkaedah 1443H bersamaan 4 Jun 2022M, Bicara Kepimpinan Da'ie anjuran Kolej Universiti Perguruan Ugama Seri Begawan dengan kerjasama Pusat Da'wah Islamiah telah diadakan di Dewan Musyawarah, Pusat Persidangan Antarabangsa (ICC), Berakas.

Hadir selaku tetamu kehormat majlis, Yang Mulia Pengiran Dato Seri Paduka Haji Bahrom bin Pengiran Haji Bahar, Timbalan Menteri Hal Ehwal Ugama, Negara Brunei Darussalam.

Majlis dimulakan dengan bacaan surah al-Fatihah dan diteruskan dengan perkongsian daripada fasilitator, Yang Berbahagia Dato' Haji Badli Shah bin Haji Alauddin, Imam Besar Masjid Negeri Sultan Ahmad 1, Kuantan, Pahang, Malaysia dengan tajuk ceramahnya Memperkasa Kualiti Du'at Ke arah Dakwah yang Progresif dan Berkesan.

Mengulas mengenai kualiti dakwah sekarang, Yang Berbahagia Dato' Haji Badli Shah mengatakan dakwah sekarang adalah dengan perwatakan yang tidak sesuai, tidak mempunyai bekalan. Kongsinya bekalan yang paling mustahak perlu dimiliki oleh pendakwah adalah pertama bekalan keimanan dan akidah. Bekalan akhlak dan moral; bekalan ilmu dan akhlak kontemporari, bersifat berani mengatakan yang benar dari sudut keilmuan untuk memperbetulkan yang salah. Mempunyai sifat kelembahlembutan, tawaduk, berlapang dada serta mempunyai sifat yang malu. Tegasnya hal ini perlu bagi mengelakkan dari penyimpangan yang boleh menyesatkan.

Yang Berbahagia Dato' Haji Badli Shah juga menjelaskan dalam ceramahnya ciri pendakwah yang baik adalah yang boleh mengubah lima perkara kepada lima perkara iaitu merubah daripada was-was kepada yakin; sombong kepada merendah diri, suka bermusuh kepada suka kepada kasih mengasihi, daripada suka bermegah-megah kepada sifat ikhlas, dan daripada suka akan duniawi kepada zuhud.

Majlis diakhiri dengan sesi soal jawab dan bacaan Doa Penutup oleh Yang Mulia Ustaz Awang Azman bin Haji Kassim, Penolong Pensyarah Fakulti Syariah, KUPU SB.



Tetamu kehormat majlis, Yang Mulia Pengiran Dato Seri Paduka Haji Bahrom bin Pengiran Haji Bahar, Timbalan Menteri Hal Ehwal Ugama, Negara Brunei Darussalam.

Objektif diadakan Bicara Kepimpinan Da'ie adalah menjunjung titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam akan peri mustahaknya memperkasa kualiti pada da'ie ke arah dakwah yang tajam dan berkesan. Ia juga adalah sebagai usaha KUPU SB dalam memberikan sumbangan secara proaktif dalam memantapkan dakwah di Negara Brunei Darussalam dengan mengadakan majlis seumpamanya agar ada perkongsian ilmu dan pengalaman dari para da'ie yang sudah dikenal pasti berkaliber malahan yang akan menyampaikan dakwah yang berkesan. Selain itu mengenal pasti cabaran dalam melahirkan da'ie yang berkualiti dan berkaliber.

Hadir sebagai peserta adalah para penceramah dan pendakwah tempatan yang bertugas di Pusat Da'wah Islamiah dan yang bertauliah dari Majlis Ugama Islam Brunei (MUIB), para pensyarah KUPU SB dan pegawai-pegawai dari Jabatan Mufti Kerajaan.

Turut hadir adalah Setiausaha Tetap, Timbalan Setiausaha Tetap, Kementerian Hal Ehwal Ugama serta Pegawai-Pegawai Kanan Kerajaan.

PERASMIAN MU'TAMAR ANTARABANGSA FIQH AL-USRAH 2022M (MUAFIQ 22) Sempena Sambutan Hari Keluarga Kebangsaan 2022M



Rabu, 8 Zulkaedah 1443H bersamaan 8 Jun 2022M, Kolej Universiti Perguruan Ugama Seri Begawan melalui Pusat Kajian Fiqh al-Ussrah telah mengadakan Mu'tamar Antarabangsa Fiqh al-Ussrah 2022M (MUAFIQ 22) bersempena dengan Sambutan Hari Keluarga Kebangsaan 2022M, Negara Brunei Darussalam dan acara Persidangan dan Pameran Pertengahan Tahun Brunei 2022M (Brunei MYCE 2022M) dengan tema, Pendidikan Ugama Teras Keluarga Bahagia Lagi Sempurna.

Hadir selaku tetamu khas adalah Yang Berhormat Pehin Datu Seri Maharaja Dato Paduka Seri Setia Dr Ustaz Haji Awang Abdul Aziz bin Juned, Mufti Kerajaan yang seterusnya membentangkan Kertas Perdana.

Majlis dimulakan dengan bacaan surah al-Fatihah, bacaan Asmaul Husna, Nyanyian Lagu Kebangsaan Negara Brunei Darussalam dan bacaan surah at-Tahrim ayat 6 hingga 8.

Ucapan alu-aluan disampaikan oleh Pengarah Pusat Kajian Fiqh al-Ussrah, Yang Mulia Ustaz Hilman bin Haji Salim juga selaku Pengerusi MUAFIQ 22.

Dalam ucapan alu-aluannya, Yang Mulia Ustaz Hilmi menyentuh akan kepentingan pendidikan kekeluargaan dalam membentuk sakhshiah anak-anak yang juga tegasnya akan menentukan kekukuhan agama, serta keharmonian bangsa dan masyarakat. Beliau juga menjelaskan

antara peranan utama institusi keluarga ialah melahirkan generasi yang bertakwa, berdisiplin dan bertanggungjawab serta mampu mendepani pelbagai isu sosial masa kini.

Tambahnya, selain menjunjung titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam bersempena Istiadat Pembukaan Rasmi Mesyuarat Pertama Majlis Mesyuarat Negara 2012 yang menekankan pembentukan keluarga yang bahagia lagi sempurna; berlangsungnya MUAFIQ 22 adalah berdasarkan resolusi MUAFIQ 21 iaitu bagi melahirkan masyarakat dengan merujuk tiga nilai norma, nilai dan norma ilahiyah yang tiada henti (Keluarga beragama); nilai dan norma Insaniyah (Keluarga Insani); dan nilai dan norma reproduksi (Keturunan). Hukum-hukum ini tambahannya meliputi hukum-hukum ibadat, muamalat (ekonomi), akhlak dan macam-macam lagi.

Majlis diteruskan dengan pembentangan Kertas Perdana oleh Yang Berhormat Pehin yang mengupas mengenai Fiqh al-Ussrah dari segi makna dan kepentingannya. Jelas Yang Berhormat Pehin, fiqh ertinya ilmu tentang hukum-hukum agama Islam. Manakala al-Ussrah bererti keluarga atau ahli keluarga. Maka ahli keluarga adalah hukum-hukum agama Islam yang wajib dipegang untuk diamalkan di dalam kehidupan berkeluarga.

Yang Berhormat Pehin juga dalam pembentangannya menjelaskan keluarga adalah sebuah institusi yang darinya akan wujud keturunan atau generasi penerus masa depan. Malahan tekannya jika keturunan atau generasi itu baik maka baiklah semuanya. Jelasnya lagi sebuah keluarga itu dapat diumpamakan sebagai sebuah negeri. Baiknya negeri itu dan subur tanamannya jika ia negeri yang baik tanahnya namun jika tidak adalah sebaliknya. Tanah yang subur bukan sahaja baik namun juga aman, makmur dan pastinya berada di bawah naungan dan peliharaan Allah yang Maha Pengampun.



Hal ini juga jelas Yang Berhormat Pehin adalah apa yang kita mahukan dalam sesebuah keluarga iaitu membangun atau menubuhkan sebuah daulah atau kerajaan Islam yang berjalan di dalamnya semua hukum (undang-undang) fiqh Islam. Nescaya rumahtangga atau keluarga yang baik akan mendapat status sakinah dan mudah mendapat rahmat daripada Allah Subhanahu Wata'ala. Ini tambahannya dapat dicapai dengan ilmu dan bukan sahaja ilmu semata-mata namun perlu ada konsep belajar tidak kira sebelum atau selepas mendirikan rumahtangga kerana perlunya dihalusi atau dipertingkatkan lagi pengetahuan yang sudah sedia ada.

MUAFIQ 22 diteruskan dengan pembentangan kertas-kertas utama secara dalam talian. Kertas Utama I, disampaikan oleh Yang Mulia Dr Md Noor bin Saper, Timbalan Dekan HEPA, Fakulti Pembangunan Manusia, Universiti Pendidikan Sultan Idris Malaysia. Tajuk pembentangan adalah Pendekatan Kaunseling Syar'ie untuk Keharmonian Rumahtangga.

Dalam pembentangannya menjelaskan kewujudan rumahtangga yang tenteram mawaddah warahmah dan wujud kasih sayang antara semua ahli keluarga adalah fokus utama keluarga bahagia. Namun terdapat beberapa perkara yang menjadi punca penceraian contohnya masalah kewangan, perselisihan faham, pergaduhan sehingga memukul pasangan dan banyak lagi. Hal ini tekannya bagi mendapatkan rumahtangga sejahtera dalam keluarga menurut Islam, terdapat beberapa elemen asas dalam kekeluargaan iaitu pengurusan rohani, pembudayaan ilmu,

ibadah, ekonomi, keselamatan, pengangkutan, komunikasi, kediaman, kesihatan dan persekitaran.

Hak berkenaan isu dalam kekeluargaan dapat dibantu dan diatasi dengan kaunseling syar'ie di Malaysia banyak membantu malahan menjadi nilai tambah kepada kaunseling yang sedia ada dalam menangani pelbagai permasalahan semasa yang dihadapi oleh Umat Islam. Ianya meliputi proses memberi bantuan dalam bimbingan dari segi fizikal, rohani dan spiritual yang berpandukan kepada al-Quran dan as-Sunnah.

Manakala Kertas Utama II disampaikan oleh Yang Berbahagia Profesor Dr H. Abdul Somad Batubara, Lc.m M.A., Ph.D Pengasuh Pesantren Tahfiz Al-Quran Az-Zahra Riau, Indonesia dengan tajuk pembentangannya, Pendidikan Ugama Dalam Keluarga. Jelasnya pendidikan dari perspektif Islam bermula dari akhlak ilmu, iman dan akal. Manakala dari keluarga pendidikan bermaksud keluarga itu beriman, berakal, berilmu dan berakhlak dan pendidikan ini bermula dari awal lagi iaitu ketika memilih pasangan.

Beliau juga mengongsikan amalan-amalan yang berkaitan dengan keluarga mulai dari memilih pasangan hingga sampai ke alam perkahwinan, ketika waktu hamil dan cara mendidik anak serta perkara-perkara yang berkaitan pendidikan ugama dalam keluarga.

Majlis sesi pagi diakhiri dengan penyampaian cenderahati kepada para pembentang dan hadiah kenang-kenangan kepada tetamu-tetamu khas majlis.

Mu'tamar juga diisikan dengan pembentangan selari secara dalam talian yang dibahagikan kepada lima kumpulan. Pada hari yang sama, sebelah petang pembentangan selari diteruskan oleh kumpulan A dan B dan akan disambung pada hari kedua dengan pembentangan selari kumpulan selebihnya.

Turut hadir pada pagi itu ialah Yang Berhormat Pehin Orang Kaya Maharaja Diraja Dato Paduka



Awang Haji Abdul Wahab bin Haji Said, Yang Mulia Timbalan Mufti, Yang Mulia Penolong Mufti, Ra'ees KUPU SB, Timbalan Setiausaha-Setiausaha Tetap, Pegawai-Pegawai Utama KUPU SB, Pegawai-Pegawai Kanan Kerajaan serta para jemputan dan orang ramai.

Mu'tamar Antarabangsa Fiqh al-Usrah 2022M (MUAFIQ 22) diteruskan lagi pada hari Khamis, 9 Zulkaedah 1443H bersamaan 9 Jun 2022M.

Hadir selaku tetamu kehormat khas majlis ialah Yang Mulia Awang Haji Mohammad Rosli bin Haji Ibrahim, Setiausaha Tetap, Kementerian Hal Ehwal Ugama dan Yang Mulia Dayang Hajah Nor Ashikin binti Johari, Setiausaha Tetap (Kemasyarakatan dan Kebudayaan), Kementerian Kebudayaan, Belia dan Sukan.

Majlis dimulakan dengan bacaan surah al-Fatihah, bacaan Asmaul Husna dan Nyanyian Lagu Kebangsaan Negara Brunei Darussalam.

MUAFIQ 22 kemudian diteruskan dengan pembentangan Kertas Utama III oleh Yang Mulia Profesor Madya Dr Haji Abdurrahman Raden Aji Haqqi dari Fakulti Syariah dan Undang-Undang Universiti Islam Sultan Sharif Ali dengan tajuk pembentangnya menjurus kepada tema MUAFIQ 22.

Yang Mulia Profesor Madya Dr Haji Abdurrahman dalam pembentangnya menyentuh pengertian kebahagiaan yang jelasnya akan didapatkan dengan diri serta zuriat yang ada keimanan. Peranan dan tanggungjawab ini dimainkan oleh setiap anggota keluarga sama ada pemimpin atau yang dipimpin termasuk suami, isteri dan anak-anak. Perlunya sesebuah keluarga itu menjalankan tanggungjawab dengan melakukan perintah Allah dengan cara memelihara diri dan ahli keluarga.

Jelasnya, bagi merealisasikan keluarga yang bahagia lagi sempurna adalah dengan pendidikan agama sebagaimana yang diterapkan oleh Rasulullah Sallallahu 'alaihi wasallam. Tambahnya, terdapat banyak cabaran dalam institusi keluarga yang mempengaruhi penghasilan modal insan dalam masyarakat. Cabaran ini dapat dilihat dari aspek teknologi, agama, keduniaan, tujuan perkahwinan, keibubapaan dan sosial. Hal ini menurutnya dapat diatasi dengan merujuk kepada al-Quran yang ada menyentuh berkenaan kekeluargaan iaitu mengenai perkahwinan, tanggungjawab dan hak suami isteri serta hak anak dan ibu bapa. Tegasnya juga agama adalah merupakan asas kepada keluarga bahagia.

Majlis diteruskan dengan kuliah khas Fiqh al-Usrah yang disampaikan oleh Yang Mulia Ustaz Adi Hidayat dari Quantum Akhyar Center, Indonesia yang bertajuk Membentuk Kebahagiaan dan Kesempurnaan Hidup Berkeluarga.



Yang Mulia Ustaz Adi Hidayat dalam kuliahnya membincangkan mengenai manusia sebagai khalifah di dunia yang misinya antaranya adalah perkahwinan dan berkeluarga. Dari sinilah jelasnya bermula kehidupan berkeluarga yang merupakan asas kepada kejayaan kehidupan sosial iaitu dari konsep berkeluarga kepada konsep bermasyarakat dan konsep bernegara.

Beliau juga menerangkan pembentukan keluarga haruslah berpandukan hudan (al-Quran) yang juga sebagai pedoman kehidupan untuk diikuti dan dipraktikkan dalam kehidupan. Tambahnya, kehidupan berkeluarga adalah tanda dalam menyempurnakan ibadah malahan akan mendekatkan diri seseorang itu kepada Allah dan menambah ketakwaan. Dengan meningkatnya ketakwaan, dekatnya diri kepada Allah dan hidup berkeluarga yang berpandukan kepada al-Quran akan memberikan kehidupan berkeluarga yang sakinah, mawaddah dan rahmah lagi sempurna.

Resolusi pembentangan disampaikan oleh Yang Mulia Profesor Madya Dr Yusuf Khalid, Ketua Bahagian Kertas Kerja, Perumus dan Pelapor. Resolusi kemudian diserahkan kepada Yang Mulia Ra'es KUPU SB dan Pemangku Pendaftar, KUPU SB yang kemudiannya diserahkan kepada Yang Mulia Setiausaha-Setiausaha Tetap, Kementerian Hal Ehwal Ugama dan Kementerian Kebudayaan, Belia dan Sukan (Kebudayaan dan Kemasyarakatan).

Turut hadir pada sebelah petang ialah Yang Mulia Ra'es KUPU SB, Yang Mulia Timbalan Setiausaha Tetap, Pegawai-Pegawai Utama KUPU SB, Jemputan Khas, Para Pensyarah dan Kakitangan KUPU SB dan para Jemputan.

Hari terakhir Mu'tamar juga diisikan dengan pembentangan selari bagi kumpulan selebihnya secara dalam talian pada sebelah pagi.

MUAFIQ 22 diadakan dengan harapan dapat memperkasa pendidikan kekeluargaan Islam dalam kalangan umat Islam pada masa kini. Antara lain, Mu'tamar juga bertujuan untuk mengenal pasti isu-isu dan cabaran dalam kehidupan berkeluarga dan mencapai penyelesaian jangka panjang dan pendek untuk menuju ke arah kehidupan berkeluarga yang penuh harmoni, bahagia dan sempurna. Bahkan, Mu'tamar juga diharap dapat memberikan pendedahan akan kepentingan nilai-nilai keagamaan berserta kaedah penerapannya di dalam kesempurnaan kehidupan sebuah keluarga muslim.

Diterbitkan Oleh

Pusat Penerbitan

Kolej Universiti Perguruan Ugama Seri Begawan

KM 2, Jalan Raja Isteri Pengiran Anak Saleha,

Bandar Seri Begawan BA 2111

Negara Brunei Darussalam

Tel : (673) 2236277

Fax : (673) 2225226



www.kupu-sb.edu.bn



[kupusb_official](https://www.instagram.com/kupusb_official)



[Kolej Universiti Perguruan Ugama Seri Begawan](https://www.facebook.com/KolejUniversitiPerguruanUgamaSeriBegawan)